

李文忠公奏稿

李文忠公奏稿

卷之三目錄

進攻太倉援剿福山摺

同治二年正月十二日

達耳第福陣亡請卹摺

同治二年正月二十二日

覆奏降將江勝海等情形片

同治二年正月二十二日

請設外國語言文字學館摺

同治二年正月二十二日

籌援常昭摺

同治二年二月十七日

西兵克復紹興諸暨蕭山等城片

同治二年二月十七日

克復福山常昭解圍摺

同治二年二月二十五日

請假授戈登總兵片

同治二年二月二十五日

克復太倉州摺

同治二年三月十六日

崑山獲勝摺

同治二年四月初五日

籌辦京米章程摺

同治二年四月初七日

米捐仿照銅捐給獎片

同治二年四月初七日

太倉獲勝摺

同治二年四月十二日

踏平昆山城外賊壘片

同治二年四月十二日

克復崑新摺

同治二年四月十六日

籌賑收復地方並酌請蠲免漕糧片

同治二年四月十六日

克復江陰縣屬之楊庫汛摺

同治二年四月二十八日

覆奏趙景賢死節摺

同治二年四月二十八日

分路規取蘇州摺

同治二年五月十一日

裁減蘇松太糧賦浮額摺

同治二年五月十一日

清查蘇松漕糧積弊片

同治二年五月十一日

擊敗江陰無錫援賊摺

同治二年五月三十日

關稅留抵軍餉摺

同治二年五月三十日

李文忠公奏稿卷三

全集一之三

桐城吳汝綸編錄

進攻太倉援剿福山摺

同治二年正月十二日

奏爲官軍節次進攻太倉援剿福山各情形恭摺奏祈

聖鑒事竊常昭被圍降眾堅守調派各軍分路進剿緣由經臣於

同治元年十二月二十七日馳奏在案二十五六等日程學啟李

鶴章等督率各營會合常勝軍正擬進攻太倉各門緣雨中止二

十七日稍霽程學啟率領先鋒開字等營由西路進方至蟠龍鎮

遇崑山援賊揮兵接戰排放洋鎗該逆抵敵不住旗隊靡亂副將

宋有勝陳有昇劉士奇等各帶隊伍往來衝殺斬首數百級生擒

百餘名奪獲旗幟刀矛無算逆匪敗回崑城我軍卽在蟠龍紮住

李鶴章令記名總兵郭松林率領桂樹松建十二營五成隊伍及

常勝軍由南路進行抵南馬頭該逆憑河築壘以拒我師郭松林
與管帶常勝軍之奧倫以洋鎗劈山礮轟擊斃賊百餘參將李恆
嵩指揮西兵施放炸礮子落賊營打死黃馬桂賊目數人乘
河斬關直入該逆紛紛敗入城中我軍卽據其壘以護西兵
正在部署間東北兩門之賊復出李鶴章飛調已革總兵況
副將梁安邦各軍向前堵禦賊卽退回天復大雨因傳令各軍
定營盤以待詰朝會戰是夜三更賊由南門出撲松建各營我軍
憑壘堅守西兵亦開放炸礮轟斃多賊二十八口黎明程學啟率
隊扼堵西南援賊來路李鶴章令松建六營分進南門兩旁護放
西洋大礮自辰至午奧倫督軍將城牆轟塌數丈我軍渡過浮橋
攀城直上詎城內伏賊以千餘洋鎗死抵缺口子落如雨兵勇傷
亡過多又值浮橋斷後隊不能接應以致仍復退下賊卽跟蹤

追出郭松林從旁迎擊立斃悍賊數十名始行潰退是時程學啟探聞賊復出恐蟠龍南面隊伍過單撤調西門外雲魁各營前往協堵而以桂樹軒標親兵四營代之該逆見我軍移動復從西南兩門出戰喊聲震天李鶴章因飭降將周壽昌及副將銜吳建瀛迎拒西門之賊郭松林迎拒南門之賊自率親兵小隊扼堵河面添搭浮橋一道郭松林等奮不顧身往來血戰將奧倫所失炸礮兩尊開花子十一箇奪回該逆敗退入城我軍仍回望仙橋駐紮計常勝軍傷亡百餘人外國兵頭亦傷十餘人一時難期力振該軍卽於二十九日退回松江是夜五鼓程學啟復率七營馳赴西門挑戰城賊堅伏不動相持數時始行撤隊三十夜據探賊有大股萬餘自崑山竄至蓬萊鎮竹司大橋之天福庵等處欲抄襲官軍後路同治二年正月初二日郭松林先派松建二營扼紮新

造橋自督四營進逼蓬萊鎮之右程學啟派開字左副二營及奇
字營由天福庵直抵竹司橋以攻蓬萊鎮之左自督開字正營及
卿雲兩營由中路直攻蓬萊鎮三路夾擊一鼓而前該逆猝不及
防見我軍勇氣百倍卽相率潰逃各軍併力猛追直至青陽港離
崑山不及十里計斬殺三百餘人生擒數十名落水淹斃者不計
其數此上年十二月二十七八等日進攻太倉及本年正月初二
日擊退蓬萊鎮踞賊之情形也其派赴福山之常勝軍五百七十
人於十二月二十四日駛抵福山二十五日正擬進口無如灘闊
水淺各船去岸或數里或數十丈不等軍士皆解衣渡水而上賊
於江邊排列隊伍意圖邀擊守備張占春駕船開礮夾護我師賊
不敢偏自辰至午師乃畢濟以河東江邊大廟爲老營沙划等船
均泊廟後賊分三路來撲一由廟東襲我後路一由河西攻我軍

之右一由河東當廟而進外國兵頭勃蘭乃分派常勝軍以左路
擊退廟東之賊以右路抵禦河西之賊並追殺過橋奪取賊卡輪
船亦開礮轟擊我軍乘勢踏燬街後賊營一座其中路配帶礮車
攻打河東之賊賊勢不支退入河西石營其營臨河對岸亦有賊
卡中通浮橋相爲犄角我軍收回廟內鑿牆爲孔安礮以守之二
十六日晷提臣黃翼升統淮揚水師三營及總兵鞠輝乾副將黃
登第各船齊集福山均派隊登岸會合常勝軍分路進剿焚燬賊
卡二座圍攻河西賊營該逆憑牆開礮不肯出戰我軍數次攻撲
陰雨泥滑未能得手海面颶風忽起黃翼升以該處沙灘無可停
泊移駐福山上三十里之鹿苑港常勝軍亦以兵力過單於三十
日撤回松江此十二月二十五六等日水陸各營奪燬福山賊卡
之情形也查進圖太倉分剿福山無非爲節節打通救應常昭起

見乃太城賊援甚眾各軍未能驟進福山賊壘甚堅孤軍又難深入頃接周興隆駱國忠正月初二初五等日自常熟城中密稟僞幕聽潮各王黨眾數萬四面圍攻月餘不退忠逆李秀成復由蘇州添賊萬餘礮船二百餘隻並帶大洋礮數十架食子數十斤於正月初二三四晝夜轟打初五黎明業將大北門外營盤攻陷西門外兩營亦相繼被踏孤城危險眾心驚惶臣無路能援徒深焦慮復調駐防浦東之記名道潘鼎新副將劉銘傳參將張樹珊等抽帶三千陸軍附搭輪船由海道繞赴福山會合黃翼升等師船相機進擊一面專謀吊書慰諭城內降眾安心死守未卜能否有救惟臣處兵力本單浦東西各城均須分防另無大枝勁兵可以進剿前疊次陳明在案今不得已而協攻太倉又不得已而遠赴福山前去後空已非穩善而事機所值勢難忽然惟有竭力籌援

以圖牽制而遏旁竄所有官軍節次援剿各情形謹摺由驛馳
陳伏乞

皇上聖鑒謹

奏

達耳第福陣亡請卹摺

同治二年正月二十二日

奏爲中外官軍進攻紹興法國兵官權受江蘇副將達耳第福中鎗陣亡請

旨優卹並派員接帶該軍恭摺奏祈

聖鑒事竊自勒伯勒東在紹興陣亡經臣等

奏明令法國兵官權受江蘇副將之達耳第福卽買武勒赴甯接帶勒伯勒東兵勇如果該員實力報效恪遵法度再懇

恩授以浙江武官職任核給卹付各在案茲據甯紹台道史致諤

稟稱上年十二月二十四日英國總兵哇藥德克親運大礮赴營

進攻紹郡該道兩商已革道員張景渠從中調度和相機而行毋任

達耳第福急功輕進二十七至三十等日紹城逆首結連蕭山諸

暨之賊約一二萬人分路竄至東浦包家山白塔洋等處希圖包

抄我軍後路經張景渠抽調游擊布興有李光等分投截擊賊即敗退並攻毀昌安鎮賊卡一座其竄近江邊之賊復經礮船轟斃百餘名我軍亦有傷亡先是張景渠克會商進兵之策張景渠議分攻稽山五雲昌安三門達耳第福力主先攻西郭門阻之不聽張景渠恐有疏失添派知縣莊鳳威勁義勇先由西北接應知府王維圻法國兵頭常師帶常安軍紫昌安門外州同謝國恩帶信義軍紫五雲門外布興有廣勇紫陶堰李光靖逆軍紫葛壩守備張其光廣勇紫東關知縣邊厚慶袁山勇及會稽民團駐嘯嶺爲前剿後防之用本年正月初一日我軍分道由東浦前進張景渠克達耳第福帶領西兵車輪大礮逐攻西郭門常安信義各軍分攻昌安五雲兩門圍攻竟日礮塌西門城堞丈餘而城上復鎗礮環施子落如雨我軍未能得手卽於酉刻收隊初二日西郭門外

連開大礮城牆轟倒十餘丈斃賊無算達耳第福獨立橋上揮兵登城該逆以鎗石堵住缺口且有逆黑洋人五六十名施放洋鎗打人達耳第福腦後傷重殞命同時陣亡外國兵頭一人西兵四名勇丁二十餘名其餘受傷者不少張景渠張德克傳令各營併力紮住惟逆援日增初三初四等日分股竄犯陶腰東關道墟高莊一帶蔓延數十里我軍以眾寡不敵傷亡頗多布興有退守煙浦李光退守梁湖張其光退至嘯唵與邊厚慶合隊駐紮遇賊東渡該道以兵力單薄添募勇丁二千名協同堵剿初六七八九等日該逆屯踞烏門山包家山白塔洋分股肆擾均經兵勇民團分投擊敗共殺賊千餘名生擒二十餘名奪獲載米賊船三隻擊沈賊船三隻所有紹東逆卡一律踏毀沿塘將次肅清布興有等俱進紮東南兩路蕭山援逆裝運火藥鉛彈二十餘船接濟紹

逆又經唾藥德克半路要截擊斃及落水死者二百餘賊奪獲藥彈十七船城中之賊懾不敢出我軍聲威大振十一日法國提督伏恭由滬來甯商派該國參將德格北前往接帶達耳第福各勇仍屯西郭門外會商張景渠相機進攻該道已將達耳第福遺糧迎護回甯妥爲料理稟請

奏卹前來臣等查達耳第福打仗素稱勇敢上年八月在甯波帶領洋鎗隊擊退餘姚各鄉之賊克復上虞亦與有力旋回滬管帶法國教練勇權受江蘇副將職任十二月間法提督商派赴甯接帶勒伯勒東舊部臣等飭聽甯紹台道節制到營之後恭順有加茲以急攻紹城身先士卒臨陣捐軀實屬異常忠勇可敬可憫相應請

旨從優賜卹以慰忠魂至接帶該軍之法國兵官德格北據史致

謬稟稱前在甯波餘姚幫同勒伯勒東帶兵防勦熟悉軍情與各營員弁亦能投洽似較達耳第福爲尤宜應俟著有功績山甯紹台道詳請

奏懇

聖恩授以浙江武官職任再由臣宗棠核給劄付現仍會同諸軍圍偪紹城所有達耳第福陣亡及令德格北接帶各緣由謹專摺馳陳伏乞

皇上聖鑒訓示謹
奏

覆奏降將江勝海等情形片

同治二年正月二十二日

再欽奉同治元年十二月二十九日

寄諭前據李鴻章奏稱官軍約會投誠匪眾克復福山要口江勝海乘勢欲殺小頭目數十名是江勝海頗知順逆此次都興阿奏稱副將魏麟彪行至謝家橋遇賊廝戰忽見已投誠之卡牆突插黃旗心知有變隨戰隨退探聞江勝海已在謝家橋復投入蘇逆等語福山海口與上海聲息隔絕原難保其毫無反覆第江勝海纔殺賊投誠何以忽又投入賊內是否江勝海性情反覆確有其事抑或魏麟彪等憚於攻勦隨意捏報李鴻章已派鞠耀乾駛泊徐六涇口該處是否仍爲賊踞著查明分晰具奏等因欽此又欽奉十二月三十日

寄諭該撫所奏各情與都興阿昨日所奏歧異恐係魏麟彪並未

前往任意捏報都興阿未及詳查據以入告著李鴻章迅速查明
據實具奏毋稍徇隱等因欽此臣查江勝海本係駐守福山賊目
周興隆招撫常昭踞賊後卽囑降將駱國忠密約江勝海投誠殺
賊內應係屬實情嗣忠逆大股圍撲常昭內外隔絕文報難通江
勝海如何復叛情形無由確查惟據鞠耀乾等咨報江陰太倉援
賊分竄福山徐六涇許浦等處南岸各口又爲賊踞臣前派守備
劉增壽扮作鄉民赴常熟城下探信該弁回稱江勝海因賊眾力
單旋又反覆忠逆將江勝海等拘押賊館另派逆黨踞守福山徐
六涇以阻我進援之路臣恐訪聞不實未敢據以上陳是以十二
月二十七日續奏摺內僅將福山復爲賊踞鞠耀乾魏麟彪等進
攻未能得手情形據實聲明都興阿等想係據探報及魏麟彪稟
詞入奏與臣疊次奏報亦屬大同小異至

諭旨垂詢練首徐佩瑗已爲蘇賊所拘其爲人向來如何被拘後如何情形錢壽仁既率眾來投有無密謀可圖太倉一節臣查永昌練首道員徐佩瑗當蘇州初陷時集團堵剿甚爲出力嗣常昭失守該員處四面賊區之中偪受僞戰毀譽參半自臣接任後疊次投稟請爲內應臣亦曲示羈縻茲爲蘇賊所執家產均被封搶其被拘後如何情形尙未探悉至錢壽仁係桐城人其率眾來歸出於至誠聞其黨眾陷在太倉者又被忠賊調回內地尙無機會可圖至正月初二三日以後常熟孤城被賊圍攻益急署提臣黃翼升督率各部師船輪赴福山白茅徐六涇各口攻剿日有擒斬圍城之賊亦分添各口以禦我師編修劉秉璋會同道員潘鼎新副將劉銘傳張遇春等統帶陸隊三千餘人於十三日駛抵福山正與黃翼升籌商登岸忽遇東北風陰雨四晝夜不息波浪如山

船不得泊十八九日風雨少止黃興升分派戰船渡師於福山上
游五里之西洋港陸續上岸連夜紮營劉秉璋潘鼎新等皆於沙
泥淺灘中赤足晁水身先士卒指揮齊進賊方出隊阻擊見我軍
氣盛未敢逼近二十日水陸各營出隊往攻福山獲一勝仗周興
隆駱國忠等於正月十三日尙有帛書出城據稱自初十日接到
臣處專弁劉增壽齎去帛書知援師卽至人心稍定惟困守月餘
軍火油鹽既俱匱乏守陣將士精力疲憊設使西北門地雷轟發
眾必驚亂恐有不測該將等惟與城存亡等情臣又飛函商令黃
翼升潘鼎新等穩紮穩進先將福山悍賊擊退卽乘機節節攻打
又恐背水之陣軍無後繼擬添派常勝軍千人馳往援應周興隆
等果能竭力死守始終勿懈或有解圍之日除援剿若何情形再
行續奏外所有查明覆陳各節及常昭福山近日軍情理合詳晰

附片馳奏伏乞
皇上聖鑒訓示謹
奏

請設外國語言文字學館摺
同治三年正月二十二日

奏爲援案請設外國語言文字學館恭摺仰祈

聖鑒事竊臣前准總理衙門來咨遵議設立學習外國語言文字學館爲同文館等因伏維中國與洋人交接必先通其志達其欲周知其虛實誠僞而後有稱物平施之效互市二十年來彼酋之

言我語言文字者不少其尤者能讀我經史於

朝章憲典吏治民情言之歷歷而我官員紳士中絕少通習外國語言文字之人各國在滬均設立繙譯官一二員遇中外大臣會商之事皆憑外國繙譯官傳述亦難保無偏袒捏架情弊中國能通洋語者僅恃通事凡關局軍營交涉事務無非雇覓通事往來傳話而其人遂爲洋務之大害查上海通事一途獲利最厚於士農工商之外別成一業其人不外兩種一廣東甯波商夥子弟僑

達游閒別無轉移執事之路者輒以學習通事爲遁逃藪一英法等國設立義學招本地貧苦童穉與以衣食而教肄之市兒村豎來歷難知無不染洋淫習氣亦無不傳習彼教此兩種人者類皆資性蠢愚心術卑鄙貨利聲色之外不知其他且其僅通洋語者十之八九兼識洋字者十之一二所識洋字亦不過貨名價目與俚淺文理不特於彼中兵刑食貨張弛治忽之大嘗焉無知卽遇有交涉事宜詞氣輕重緩急往往失其本旨惟知藉洋人勢力播弄挑唆以遂其利欲蔑視官長欺壓平民無所忌憚卽如會辦防堵一節間與通口漢語之大酋晤談尙不遠乎情理而瑣屑事件勢不能一一而商因而通事假手其間勾結洋兵爲分肥之計誅求之無厭挑斥之無理支銷之無厭欺我弊嗜逞其鋒或遂以小嫌釀大衅洋務爲

國家懷遠招徠之要政乃以樞紐付若輩之手遂至彼己之不知情偽之莫辨操縱進退汙不得其要領此非細故也京師同文館之設實爲良法行之既久必有正人君子奇尤異敏之士出乎其中然後盡得西人之要領而思所以駟馭之緩靖邊陲之原本實在於此惟是洋人總匯之地以上海廣東兩口爲最種類較多書籍較富見聞較廣語言文字之粗者一教習已足其精者務在博采周咨集思廣益非求之上海廣東不可故行之他處猶一齊人傳之之說也行之上海廣東更置之莊嶽之間之說也臣愚擬請仿照同文館之例於上海添設外國語言文字學館選近郡年十四歲以下資稟穎悟根器端靜之文童聘西人教習兼聘內地品學兼優之舉貢生員課以經史文藝學成之後送本省督撫考驗作爲該縣附學生准其應試其候補佐貳佐雜等官有年少聰慧

願入館學習者呈明由同鄉官出具品行端方切結送局一體教
習藉資照料學成後亦酌給升途以示鼓勵均由海關監督籌
試辦隨時察覈具詳三五年後有此讀書明理之人精通番語凡
通商督撫衙門及海關監督應添設緝譯官承辦洋務卽於學館
中遴選承充庶關稅軍需可期核實而無賴通事亦斂跡矣夫通
商綱領固在總理衙門而中外交涉事件則兩口轉多勢不能以
八旗學生兼顧惟多途以取之隨地以求之則習其語言文字者
必多人數既多人才斯出彼西人所擅長者測算之學格物之理
制器尙象之法無不專精務實泐有成書經譯者十縱一二必能
盡閱其未譯之書方可探賸索隱由粗顯而入精微我中華智巧
聰明豈出西人之下果有精熟西文轉相傳習一切輪船火器等
巧技皆可由漸通曉於中國自強之道似有神助如蒙

俞允一切章程及薪資工食各項零費容臣督同關道設法籌畫
或仍於船鈔項下酌量提用其廣東海口可否試行有無窒礙之
處懇請

飭下該省督撫體察辦理臣愚昧之見是否有當伏乞

皇上聖鑒訓示遵行謹

奏

籌援常昭摺

同治二年三月十七日

奏爲水陸官軍籌援常昭進紮福山節次接仗並常昭降眾堅守
崑太各路防剿情形恭摺馳陳仰祈

聖鑒事竊署提臣黃翼升督率各部師船編修劉秉璋會同道員
潘鼎新副將劉銘傳張遇春參將張樹珊等統帶陸隊三千餘人
先後攻剿福山經臣於正月二十二日附片馳報在案旋准黃翼
升劉秉璋節次來函及潘鼎新等稟稱我軍從福山上游五里之
西洋港陸續上岸紮營連破賊卡正月二十一日潘鼎新劉銘傳
張樹珊徐得勝各率所部分三路進剿遇賊於同觀山之北徐得
勝胸受鎗傷三處劉銘傳張樹珊往來衝突適偽聽王大股來援
千總袁定邦奮勇接仗身受重傷猶手刃數賊而死我軍以寡敵
眾勢不能支且戰且退是時鼎字正營列隊田山福山之東有字

營列隊茅家山之西鼎字前營列隊海塘之上該逆一由茅家山一由石壘衝出並撲我營潘鼎新軍接戰賊隊屢卻我軍追至街口相持不退復有另股來撲潘鼎新及知州吳毓芬各帶小隊橫衝而東賊爲披靡乃聽逆大股由西路回抄直趨海塘已包鼎字營之後我軍拚死突圍而出漸撤隊回營黃翼升親督水師由廟後兜截將賊擊退計我軍陣亡百餘人受傷數十人二十三日樹字營進紮蘆浦港口之西距賊營里許銘字營亦移於其南跨海塘爲壘二十四口鼎有得三營亦皆派隊進紮營壘未成而賊已出隊一股由東路撲銘樹新營劉銘傳施放炸彈賊不敢偪由海塘而西我軍出營尾追斃賊無數餘賊敗回謝家橋一股乃僞聽王親率悍賊直犯銘樹舊營營內不及百人游擊董鳳高督勇憑牆開礮屢撲不動遂分犯鼎得兩營炸擁而進牆內鎗礮齊施

擊斃騎馬賊目賊猶抵死不退伏於墳坎之間子如雨落潘鼎新
張遇春潛出小隊以洋鎗擊斃執旗老賊賊始稍卻張樹珊自東
路趕至一齊追殺賊復回撲張樹珊右肘受鎗子傷猶復大呼奮
擊追過海塘該逆向繆橋田莊一帶退去是日殺賊數百人我軍
間有傷亡方賊圍撲之時副將黃登第艇師向岸開礮黃翼升亦
帶各船由鹿苑來援先用排礮轟擊各營官爭先登岸將岸邊之
賊殲斃無數始行收隊二十五日鼎有得等營亦皆移紮蘆浦港
之兩岸二月初四日參將李恆嵩督帶常勝軍千餘名駛抵福山
鼎字營遂撥隊移紮福山之嶺樹字營撥隊移紮福山之東崖下
初五日有字營又移紮樹字營之前與賊壘相去不及半里常勝
軍以礮車推至有字營牆外轟擊春字營隊勇亦偕往施放開花
礮將賊壘打塌丈餘轟斃守賊無數各營出隊猛撲脫衣渡濠伏

於牆下賊從牆內開放鎗礮抵死不退水師由廟後上岸列隊海塘攻其別壘正在酣戰間常熟城外援賊踵至一股倚賊營爲陣一股攻鼎樹有新營一股分上同觀山塔山窺我後路劉銘傳帶小隊衝上茅家山擊退同觀山之賊張樹珊列隊海塘以防塔山之賊相持至暮賊各回巢我軍亦卽收隊此正月二十一二十四二月初五等日我軍會攻福山連戰獲勝之情形也臣兩次接到常昭城內帛書據稱正月二十八日該逆以大礮轟倒東門城牆二三丈賊卽乘勢爬城周興隆駱國忠等各督洋鎗礮隊抵擊斃賊不少並用皮箱門板等物將缺口堵住復添來悍賊數千各帶雲梯數百具麇聚西山意欲緣城而上亦經將士開礮抵住其夜該逆又移泊大船兩隻多裝洋鎗在小東門外河下搭造浮橋并於河之對岸築卡安置大礮數尊轟我城牆壩處日夜不休受傷

兵勇甚眾二月初三日該逆在大北門外添卡四座又用大船匿
賊渡河潛在相近河岸開挖地道聞僞忠王帶賊眾十餘萬由南
京來攻常熟不日卽到城中諸物缺乏恐難持久等語此常昭被
圍勢更危急之情形也至程學啟李鶴章等進紮崑太之交相度
形勢以達南鎮爲賊來往要隘欲於該鎮添築石城以遏竄路二
月初一日程學啟督飭各營勇夫修築達南石城派奇字副營志
魁兩營堵禦太倉之賊派開字中後兩營堵禦崑山之賊初二日
該鎮自帶親兵小隊三百餘名鎗船十四隻由達南前往太倉進
探地勢忽見逆匪千餘名乘船蜂擁而來當令親兵排列洋鎗扼
要轟擊酣戰兩時之久未分勝敗當卽揮軍少退復令鎗船依傍
旱隊開放鎗礮立斃黃衣賊目二名斬獲悍賊數十名生擒八名
被傷落水者不計其數直追至太倉西門初三日清晨復督各營

照舊興工該逆千餘名船百餘號由六渡濱進竄程學啟調洋鎗
隊四百名親兵小隊三百名並巡湖水師船十隻由大通橋至六
渡濱見逆匪紛紛打館有劉主將旗號卽揮兵進擊該逆不意我
軍之至未及列隊卽行奔潰程學啟自督小隊跟蹤追至青陽港
離崑山城三里許隔河有賊營兩座因天已昏暮且隔大河未便
窮追仍收回錢鳴塘防次其達南石城已於初六日告成派知府
符信帶兵守之太倉賊股連日分出東北窺竄亦經李鶴章派隊
擊回此修築達南石城防剿崑太兩路之情形也查常昭縣城雖
經降眾同心固守惟忠聽各股援賊圍攻兩月有餘自福山至縣
城連營數十里層層阻隔聲息難通現在福山營盤紮定而賊壘
更堅賊援甚廣我軍水陸不過四千人竭力攻打實虞眾寡不
敵常勝軍自在太倉敗挫銳氣未復近以奧倫約束不嚴英國提

督上迪佛立復申前約請派英兵官戈登接帶臣而騎戈登添派
隊伍借買英國鎗礮軍火剋日馳往福山協力援剿戈登允卽准
備未知常昭降眾再能苦守以待之否太倉崑山兩城爲蘇州門
戶賊所必爭此攻則彼應彼攻則此應地勢旣難於進偏兵力亦
絀於兼顧此時忠逆由金陵回窺而金華紹興新復浙東全境肅
清侍逆亦無駐足之所數十萬悍賊縱橫蘇杭數百里間臣軍頗
形喫重兵單地廣在在堪虞所望上游新募水陸各營陸續齊集
分路布置庶可漸圖得手此次福山力戰陣亡之五品頂戴儘先
千總袁定邦請

旨敕部從優議卹以慰忠魂其餘傷亡弁勇除查明另行
奏卹外所有福山常昭崑太近日軍情理合專摺由驛馳陳伏乞
皇上聖鑒訓示謹

奏

西兵克復紹興諸暨蕭山等城片

同治二年二月十七日

再據浙江甯紹台道史致謬節次稟稱正月十九二十兩日賊山蕭山義橋臨浦一路竄來疊經已革道員張景渠分派各軍會合攻剿一勝之於下方橋再勝之於安昌塘該逆節節敗退兇蹤頓消英國總兵映樂德克由滬解來大礮並稅務司日意格調來法國洋兵陸續到營軍威益壯紹城逆首周姓見我軍四面圍攻屢戰屢捷勢不能支逆黨楊應柯密遣難民持信赴營投誠約會內應二十五日三更後城中火光四起周逆率眾出城遁去二十六日早楊應柯即開門迎降我軍一擁而進立將紹興府城收復先是甯諸暨縣逆黨方蒂桂張茂夫程爲懋等乞請投誠該縣團董趙春林探知城內踞逆僅五六千名當即號召各處民團分路環攻投誠之方蒂桂等亦隨同攻打即於正月二十二日克復諸暨

縣城殺賊無數餘逆遁往富陽是日逆黨何文慶率眾攻撲官兵民團合力迎擊斃賊數百名民團亦有傷亡何逆敗往山陰瀉渚地方而去自紹城克復後張景渠立調各軍由安昌塘柯橋分路追勦節節進攻該逆且戰且退本月初二日黎明我軍直薄蕭山城下該逆閉門困守我軍奮力擊斃守城之賊緣梯而上立將縣城克復餘逆飛遁過江其詳細情形再行查明稟報等情臣查金華蘭溪湯溪龍游各城先經左宗棠將益澧等攻克茲又連復紹興諸暨蕭山各城浙東漸就肅清即可會攻杭省軍務大有轉機實屬非常慶幸現在嚴紹道路已通其克復一府二縣詳細情形應由該道稟請浙撫臣專摺具奏酌請獎勵理合先行附片馳陳仰慰宸廑伏乞

聖鑑錄
奏

克復福山常昭解圍摺

同治二年二月二十五日

奏爲官軍大獲勝仗克復福山節節掃蕩常昭立即解圍恭摺奏
祈

聖鑒事竊水陸官軍籌援常昭進紮福山節次接仗並常昭降眾
堅守各緣由疊經臣奏報在案鼎字樹字有字等營既紮定福山
左右與賊營相對常勝軍亦駛抵福山二月初五日併力攻打未
能得手初六以後各營更番輪戰使賊不得休息十五日銘字營
暨親兵營自王家橋進剿適天股賊由小市橋窺我西路突遇我
軍賊大驚擾副將劉銘傳揮軍追殺數百名生擒百餘名是日接
帶常勝軍之英兵官戈登馳抵福山上岸徧察形勢十七日編修
劉秉璋道員潘鼎新會商戈登約定常勝軍以大礮轟擊賊壘各
營專打援賊兼挑奮勇數百人會合常勝軍預備爬城十八日卯

刻署提臣黃吳升帶各部水師山西路上岸令總兵王東華列隊
西山之左副將周國興列隊西山之右總兵鞠耀乾知州吳毓芬
參將鄭龍彪等列隊西山之後親兵得字營伏於西山之內銘鼎
等營伏於同觀山左右以小隊誘敵樹字營列於毛家山之前有
字營暨已革道員馮席珍所帶小隊列於港西賊營之側常勝軍
長刻出隊以西洋大礮安架福山舊城門上小礮分列其旁令呂
宋兵乘坐小船駛近賊壘搭架浮橋各營奮勇伏於舊城牆下自
已至午連放開花炸彈擊倒港東賊壘數尺副將張遇春揮令各
營奮勇外國兵官揮令常勝軍擁至港邊賊猶憑牆開放鎗礮子
落如雨我軍渡過浮橋山倒牆闕處而進賊尙抵死抗拒我軍刀
砍矛刺盡殲之港西賊營猶未肯退有字營衝撲數次各營奮勇
暨常勝軍一齊擁上賊始逃竄當我軍攻壘之際謝家橋大義橋

小市橋等處賊營數十座同時出隊來援約四五萬人分爲三股一股包西山之西黃昇白帶親兵暨王東華周國興等向前迎戰劉秉璋率親兵得字等營從山後繞出賊前賊不得進一股趨向同觀山潘鼎新劉銘傳偃旗不動俟賊近山麓兩伏齊發賊勢不支我軍分路抄追斬馘無算一股倚賊營之西與營內踞賊相爲依護參將張樹珊揮軍搏戰五六回合見賊營已潰而援賊列陣其後橫亙十餘里包過我軍意欲將賊營奪回我軍併力奮擊人人殊死戰賊爲披靡紛紛退去當將福山石城收復是夜各營復選精銳攜帶噴筒火箭潛襲大義橋謝家橋賊壘齊聲喊殺賊於昏黑驚遽中不知我軍多少棄營狂奔我軍節節掃蕩踏毀沿途賊營數十座先是圍城之賊多赴福山又添黑旗賊數千人攻撲甚猛十六夜周興隆駱國忠等商派奮勇千人分由四門殺出

連日鏖戰踏敗該逆附城營卡二十餘座十九辰刻瞭見賊眾退
入西山一路福山火起知我援軍獲勝當即派隊迎會福山得勝
之師前後追剿董正明驍勇過人生擒賊首孝天義朱衣點一名
餘逆斬獲甚眾奪獲賊船數十隻旗械鎗礮無數城圍立解黃興
升劉秉璋潘鼎新劉銘傳等均卽入城慰勞降眾此十八九日攻
克福山常昭解圍之情形也臣查常昭投誠雖久崑太兩路未通
福山各口又被援賊復踞而大股十餘萬圍攻七十餘晝夜無論
智愚皆料其必難自存臣不忍負降人死中求生之意太倉堅城
既屢攻不下因抽調水陸各營航海繞赴福山竭力援勦而眾寡
懸殊後無接應形同孤注口切焦憂所幸眾志成城拚死守禦海
口援軍出奇入險助以西人礮彈遂得掃除逆壘打通後路以解
常昭之圍實非臣初念所及除派飭劉銘傳督帶銘字各營會同

知府張樹聲參將張樹珊各營分紮福山港口並咨商黃翼升酌
撥水師三營與城內外陸軍相依防守一面檄調潘鼎新一軍迅
回金山衛以防浙西竄賊並查明在事出力文武員弁及先後陣
亡弁勇分別奏請獎卹外所有福山克復常昭解圍緣由謹摺
由驛馳奏伏乞

皇上聖鑒訓示謹
奏

請假授戈登總兵片

同治二年二月二十五日

再英國兵官戈登甫經接帶常勝軍經臣以常昭圍急福山兵單
諭令往助該兵官卽星夜帶隊馳往與諸將士和衷籌商併力攻
克英提督士迪佛立前爲臣言戈登奮勇明白爲駐滬英兵頭之
冠臣初未敢信自會帶常勝軍往來臣營稟商調度情詞恭順並
思四出攻剿迅掃巢穴又以常勝軍習氣太壞欲漸漸約束裁制
其志趣實爲可嘉去冬士迪佛立與臣定議該國管帶官與中國
鎮道平行戈登既爲中國帶兵似應循照成案請

旨暫假以中國總兵職任以便臣等節制調遣俟其事竣回國再
請撤銷是否有當伏乞

聖鑒訓示謹附片具

奏

克復太倉州

同治二年三月十六日

奏爲官軍連日會攻太倉直隸州城旋即克復殺賊淨盡專摺馳陳仰祈

聖鑒事竊自福山攻克常昭解圍後太倉守賊僞會王禁元隆屢次遞稟乞降情詞懇摯臣未忍絕其自新之路因剴切劄諭並派員入城開導勒令及早獻城該逆首請卽於三月初九日派隊分紮四門預備接應李鶴章程學啟等如期嚴陣以待是日午刻東門忽出賊匪數千頭紮白巾聲稱擺隊迎接南門又出賊萬餘各路伏賊齊起我軍分頭迎勦眾寡不敵致被衝動李鶴章所部各營已偏東南城根且戰且退傷亡弁勇數百名李鶴章腿受鎗子傷幸不甚重程學啟所部進扼西門又當崑山來路有賊數千由崑山來並有賊船八十餘號程學啟派弁迎探見該逆等語言親

密恐有詭計當飭各軍准備出戰忽大股賊由南門抄出又由西門突出悍賊數千蜂擁來撲前後圍繞程學啟揮令各將士併力攻剿戰數十合斃賊千餘仍將該逆擊退十一日該逆數千竄撲婁塘前敵營盤副將梁安邦等擊走之其時戈登李恆嵩已帶常勝軍由松江圖攻昆山聞信卽調該兵官逕赴太倉合力進攻復派編修劉秉璋馳往幫同李鶴章料理出隊程學啟與戈登等面商妥協卽於十二日督派三營進紮太倉西門並調副將陽利見帶淮揚水師中營同紮西門大河戈登李恆嵩是日帶隊由南門進毀賊卡三座十三日竟日大雨我軍站隊不動十四日黎明逆首際天福李文熙帶礮船三十餘號堵截河口程學啟派洋鎗隊四百餘名繞襲該逆後路自督水陸各營兩面轟擊奪獲礮船多隻該逆窮蹙乞降當將賊首際天福並偽爵燕豫等十九名悍

逆百餘名悉數誅戮賊出援又經擊退賊膽已寒是日巳刻戈登帶西洋礮位至程學啟營前安設先將西門賊紫石壘二座全行轟破程學啟派隊守之十五日李鶴章派隊進紮南門防賊竄逸戈登排列大礮在西門外連環轟擊城垣斃賊甚多該逆仍死拒不退我軍添礮四面開放自巳至申擊倒城頭悍賊不計其數轟裂城垣十餘丈各營奮勇搶越城濠一擁而上刀砍鎗擊賊眾披靡該逆欲由南門出竄又被我軍擊回程學啟戈登李恆嵩等登時進城捕殺各軍因賊詭降屢次拒傷官兵憤恨人骨立將城賊萬餘人圍而殺之偽會王率二千人突圍由北門逃出程學啟等派隊緊追立擒蔡元隆裂其屍餘匪追斬殆盡遂於三月十五日申時克復太倉直隸州城現飭李鶴章派隊入城布置防守程學啟仍會同戈登乘勝進攻崑山以聯常昭之氣此次在事尤爲

出力人員並傷亡弁勇容臣查明彙請獎卹並續招詳報戰狀外
所有克復太倉州大概情形理合專摺馳陳仰慰

聖鑒伏乞

皇太后

皇上聖鑒訓示謹

奏

崑山獲勝摺

同治二年四月初五日

奏爲太倉全境肅清官軍進紮崑山城下攻剿獲勝恭摺奏祈

聖鑒事竊太倉克復後李鶴章帶隊入城布置防守程學啟會同

戈登乘勝進攻崑山業於三月十六日馳報在案李鶴章於十六

七日飭派總兵郭松林等追剿苗涇支塘餘逆擒斬無數太倉境

內一律肅清業與常熟福山各營來往通氣總兵程學啟督帶所

部於十七八日陸續進佔崑山東門跨河立營戈登亦帶常勝軍

同抵城根徧察形勢崑城四面大河賊守甚嚴猛攻兩日未能卽

下仍須添備攻具常勝軍向無營帳露宿在外已歷旬日不免疲

乏戈登李恆嵩遂於二十日撤隊回松總兵程學啟自督水陸各

營扼紮崑城東面力籌攻剿臣因太倉新復崑山軍情未定於二

十一日親帶小隊由嘉定馳赴太倉與李鶴章商籌布置於太倉

北門外通常熟蘇州之路分紮八營以堵援賊周慄城垣雖已殘破不堪布守尙爲完密二十三日馳往程學啟崑山營次察度城賊情形堅踞不出我軍兩岸分紮中搭浮橋氣勢尙爲聯絡二十四日周慄襲江青陽江吳淞江各河道宜川水戰之地淮揚水師陽利見成俞卿張光泰三營分扼水口與陸軍相爲依護二十六日由水路折往青浦飭守將滕嗣武加意嚴防如蘇崑窮寇乘虛內竄與現駐千墩水陸各營互爲援應二十七日松江府城面商戈登添備攻具剋期赴崑山會剿是夜仍馳回上海連據程學啟稟稱四月初一日派副將劉士奇由東門滾紮北門外月河橋步步進蹙程學啟帶三營隊伍前往更樓橋周市一帶察看地勢有賊千餘紛紛竄伏卽飭參將周良才排開隊伍該逆見我軍嚴陳而來自知不敵退回城中程學啟卽飭周良才等就地扼紮

以杜該逆由北門出竄初二日五鼓劉士奇帶隊在月河橋紫營
程學啟親督各營洋鎗隊並副將陽利見礮船前往堵禦比至天
明城上逆眾睨見我軍已紮營牆卽剎大股由南門衝出繞襲我
營並於城上開礮抵拒程學啟督令各軍一面紮營一面奮勇截
殺互相攻擊三時之久斃賊數百名其被洋鎗擊傷者不計其數
該逆敗退入城劉士奇營濠花椿均已密布森嚴該營離城不過
數十丈擬借輪船大洋礮兩尊調齊水陸隊伍併力攻打儻能得
手立即搭造浮橋渡過奮勇拚死爬城所有雲梯橋筏均已備齊
戈登昨由松來滬商借英國礮火亦約定兩三日內帶隊前往會
攻探聞崑新城賊欲糾蘇州踞逆偽慕王譚紹光合力抗拒保此
要隘然屢敗之餘勢已窮蹙偽忠王李秀成已帶大股赴皖北巢
縣廬江等處與鮑超各軍相持似難速回援救或可乘此機會迅

克崑城如崑城可得則與常熟各軍進規蘇州前路河湖交匯支
汊皆通水師既易得力陸軍亦便分扼其現踞常州偽護王陳坤
書一股現由楊庫顧山同窺福山總經總兵劉銘傳等分兵截剿
現踞嘉興偽聽王陳炳文一股赴援杭州富陽又分股圖撲章練
塘洙涇一帶以牽制我師亦經參將會敏行都司曾光漢師船合
力擊退臣惟有督飭各軍分籌防剿穩慎圖謀以期仰慰

慈庥除續後戰狀再行馳報外理合繕摺由驛馳

奏伏祈

皇上聖鑒訓示謹

奏

籌辦京米章程摺

同治二年四月初七日

奏爲遵定籌辦京米章程並先飭商試運三萬石剋期放洋恭摺
奏祈

聖鑒事竊臣於二月十四日承准議政王軍機大臣字寄同治二
年二月初二日奉

上諭李鴻章奏籌備京米情形一摺前因戶部奏請籌款由江蘇
省購運商米以實京儲當經諭令李鴻章趕緊購買陸續運津茲
據該撫奏稱現擬責成商人分赴湖廣等處采辦並設局勸辦各
等語江蘇省各府縣產米不敷民食向賴湖廣等省商賈販運近
來米商斷絕采購維艱自係實情卽著照該撫所議責成商人分
赴湖廣江北一帶采辦由該商承運赴津交兌勸諭商紳各富戶
無論粳秈洋米或自行捐運或湊繳銀錢交商購運儘捐儘解藉

濟要需并著妥議章程設局勸辦該商等捐有巨款准其隨時奏
獎其湊捐各散戶并准其彙案分別咨部核辦各等因欽此當經
督飭司道設局勸辦酌派商董按數籌捐期於必成惟滬上用兵
以來事事皆資商力臣軍水陸數萬人四處攻剿專恃各項捐釐
接濟祇此一縣之貿易艱難搜剔竊所疚心此次籌辦京米該司
道等宣布

朝廷德意商民感激圖效無敢阻難兩月以來酌量攤派值商力
疲乏之時又兼米價騰踊日久未能定局湖廣江西米價亦昂民
閒處處阻禁不准出運采辦尤難該商董等現在設法收買粳秈
洋米共計三萬石由司道等會議章程先飭運津兌收仍趕緊籌
捐採購接續放洋臣維該商等急公圖報自應查照舊章力求撙
節俾其少一分浮費即多一分捐輸謹擬章程清單並將現在

籌備京米三萬石先行試運情形由驛具陳伏祈

救下戶部覈准并飭倉場侍郎直隸總督轉飭天津道驗收接運
再據該商等呈稱上年奉飭采買運津米十一萬三千石除已購
運米九萬四千六百九十石外尙短米一萬八千三百一十石又
在津奉剔駁換及各船短交米三千一百九十一石共計短米二
萬一千五百一十石并未領過米價銀兩茲又奉飭捐辦分批起運
所有上年認運短少米石實屬力難兼顧請寬免以紓商力等語
由總局司道具詳請奏前來臣查上年認運之米本係由官發價
采辦該商等尾欠米石既未領過米價銀兩現在籌辦捐輸自不
能再令賠墊補繳應懇

恩施敕部將上屆短運米石准予寬免以示體卹而清界劃合併
聲明統祈

皇上聖鑒訓示謹
奏

米捐仿照銅捐給獎片

同治二年四月初七日

再各省籌辦捐輸事例日煩捐數日少嗣經部臣議定分發指省捐復驗看及各項班次均由京銅捐局辦理外省不准報捐實爲整頓捐務之要法此次采辦京米雖係仿照歷屆米捐章程設局勸辦而捐項過鉅商力更疲非酌量通融不足以資鼓舞查銅局在京輸銀與滬局運津輸米同爲裨益京儲若以銅局定章爲準藉廣招徠仍以米石收數爲衡庶存限制將來此項米捐總計銀數不過數十萬兩應請准照捐銅局事例給與獎敘專案核辦俟所捐米石運津完竣之日卽行截止其零星散戶報捐先須核發執照應請部頒發各項職銜翎枝空白執照一千張由驛遞交以便隨時填給可否飭下部臣核准辦理使商民等樂於輸將似於籌辦京米要需不

無裨益謹附片具

奏請

旨

謹將籌辦米捐章程開具清冊恭呈

御覽

今開

一江蘇兵燹之後產米無多客米又爲賊境阻隔來源稀少湖廣江西等省米價一例翔貴采辦尤難現令紳商就地收買無論粳和洋米一律兌收以期迅速起運

一咸豐五年米捐案內按照福建成例每米一石作實銀四兩二錢按照籌餉新例捐職銜者原減二成准其再減一成七折申算作銀六兩捐紀級封典升銜者原減四成准其再減一成五折申算作銀八兩四錢咸豐七年米捐案內復經部議免繳部照費及歸公飯食銀三錢九分仍以每石實銀四兩二錢核算其時外省米價每石不過二兩餘加以食耗水運一切經費申算四兩二錢

今江蘇米價每石需銀五兩有零洋米運販江蘇者亦視廣東天津等處價值加增合之食耗運費已至六兩以外從前奏定五兩米價就時價約略核計所有需用一切經費自應按照各項開銷實數加增入米石內每米一石作銀五兩七錢五分六釐一毫以昭平允

一前屆捐米案內隨繳津通食耗米二升沙船耗米八升督運員弁沿途食米均在其內此次由商購運無須督運員弁每石川酒斛加沙船耗米六升津通耗米二升
一前屆采辦章程沙船水腳及神廟犒賞席片等項每石其給銀四錢二分八釐一毫今核減四分實給銀三錢八分八釐一毫又津通剝船各費仍照采辦舊章每米百石繳剝費銀四兩八錢雜費銀三兩三錢四釐概交天津道彙收核辦

一沙船領運仍照向章給與三聯執照赴津兌收每船各封樣米三分加貼印花以憑呈驗仍由商戶舉派董事一人赴津照料掣取上兌回批

一應屆海運成案承運沙船准搭二成貨物免其納稅交捐應一律照舊辦理其重洋往返應帶礮械防護仍會會沿海水師鎮將接護出境

一前定新章所有指省分發驗看捐復各項名目概歸捐銅局辦理外省不准報捐此次采辦京米亦與京銅捐局上兌無異所有前項名目外省不准報捐者應請一律推廣暫准給獎其本身不願請獎者仍准其移獎俾商人得以踴躍報效其餘各捐不得援以爲例

一應屆籌辦京米章程皆先設局辦理委員及書辦薪水例有開

銷此次籌辦總局卽設在糧儲道公館薪水及一切局用開銷悉從節省以恤商力其承辦之廳縣各委員俟捐有成數分別勞績另案

奏請獎敘以示鼓勵

太倉獲勝摺

同治二年四月十二日

奏爲大股悍賊分投援應崑山竄犯太倉均經官軍奮力堵剿疊獲勝仗太境已無賊蹤恭摺奏祈

聖鑒事竊太倉全境肅清官軍進紮崑山城下攻剿獲勝情形業於本月初五日馳奏在案其攻剿崑山一軍係程學啟主之派開字老中營新中營紮東北兩門之間奇字副營紮東門外之月河橋離城數十丈初三日程學啟親督各營直逼城根開礮轟打城上悍賊拚死抗拒礮子往來如織我軍不能仰視猶譟斃城賊多名會所用西洋大礮開花子告罄輪船亦被城礮打穿一處賊卽乘勢由南門衝出擾及東門欲襲我軍之後程學啟當派開中開左兩營奇字營隊伍親督迎剿陣斬賊匪數百名該逆敗退入城旋據探報僞蘇王來王等糾集大股數萬來崑援應初七日辰刻

有賊萬餘復由南門繞過東門兼至青陽江一帶程學啟派洋鎗
隊數百名前往牽制商令各水師會同轟擊行至對河互開鎗礮
斃賊百餘賊始披靡仍向南門退走復從北門衝出直撲開字新
中營當令副將陳有昇朱有勝協同參將何安泰竭力堵禦立斃
悍賊多名該逆死踞營右高坡意欲築營屯紮我軍以洋鎗轟斃
黃衣賊目賊卽退回其援逆分股竄擾周市更樓橋等處初八日
督同宋有勝周良才王永勝前往擊之鎗斃賊百餘乃卻退
僞拱王一股復由北門搭造浮橋直抵開字左營之前因天已薄
暮未令出隊初九日黎明該逆由南門衝出萬餘人北門衝出五
六千人分偏我營別出悍賊數千直撲開字新中營濠牆意欲踰
濠而入水師併力轟擊何安泰等各守營牆開礮斃賊不少該逆
更番死鬪復經各軍互相攻擊自辰至未酣戰四時生擒及轟斃

者不下二三千人賊始返奔我軍逐北數里落水之賊不計其數
直追至城根收隊此大股悍賊援應崑山經我軍奮勇擊敗之實
在情形也其留守太倉一軍係李鶴章主之派督標兩營撫標正
營扼紮毛家市橋建字三營扼紮北門五里杜家橋復調盛字正
副營親兵前營移紮雙鳳鎮東頭爲犄角之勢其八里橋小路另
派游擊衛汝貴築一小石營憑河扼守布置甫定卽據探報四偽
王大股約六七萬眾欲攻打太倉以解崑山之圍初七日辰刻盛
字等三營正在挑築長濠游擊道邦喜孫善成各帶小隊探至雙
鳳街口該逆馬隊百餘突至當卽迎擊鎗斃馬賊三名而賊大股
踵至圍撲我營周盛波督隊憑牆固守一面抽隊繞過街西從後
抄擊游擊孔昭佑周盛傳衝出前營該逆前後受敵卽向街南奪
路狂奔遁回周市初八日黎明偽來王復率六七千眾逕撲親兵

前營越濠拔柁而進周盛波先於營內設礮臺二座連環放鎗礮擊斃紅衣黃衣騎馬賊目數十名賊復分隊三四十圍撲盛字副營一面在街口修造石卡周盛波令周盛傳由雙鳳鎮之石孔昭佑由雙鳳鎮之左分路包抄自帶親兵礮礮船直入街內賊見我軍分路夾擊築卡之賊先行潰逃所有圍撲前副兩營之賊傷亡過多僞來王亦中鎗傷奪路而遁周盛傳孔昭佑等合力兜擊該逆人馬紛紛投水水爲不流李鶴章派副將吳建瀛守備劉超廷各帶洋鎗隊伏於樹屋叢密處截殺百餘名與周盛波等合隊追至鴛鴦橋見有大股援逆屯紮遂各收隊初九日僞慕王湘王率三萬餘眾由雙鳳鎮之石來撲親兵前營並由鎮北大河偷搭浮橋圍我前營東面兼撲正營北面四路環攻子如雨注周盛波等連開鎗礮擊斃騎馬賊目十餘人賊猶抵死猛撲周盛傳自帶

親兵伏於牆外木城排放洋鎗與營內大礮轟擊賊無算孫善成水師往來會勦自辰至午過河之賊愈多周盛傳派隊乘船渡河將守橋之賊擊斃數百浮橋立即燒燬賊乃膽怯遁去其雙鳳鎮左之賊正在圍撲副營周壽昌帶隊衝進孔昭佑由營衝出兩面合擊該逆退踞石橋周壽昌躍馬直入鎗斃黃馬桂賊目一名賊眾死拒周壽昌被洋鎗打穿左腿膊猶裹創力戰適吳建瀛及游擊顏邦桂趕到伏於街旁屋內施放洋鎗相持兩時之久該逆龍旗大隊忽被我屋內鎗子擊動賊隊遂亂周盛傳孔昭佑自營內突出與援軍夾攻賊紛紛撤退是夜大廟河川橋一帶賊卡復經知縣余思樞游擊衛汝忠及吳建瀛等分路襲破殺悍逆數百名又有另股竄踞沙溪鎮分擾季家灣黃中元何映文挑選奮勇五更出隊比至季家灣天色微明賊不及防忽見我軍馳入倉皇

亂竄追至沙溪所向披靡該逆仍由直塘奔回白相蹂踐港多路
窄淹斃無數周盛傳孔昭佑等亦督帶洋鎗隊由直塘以西跟追
該逆四路逃竄復擒斬數百名落水死者尤眾諸僞王遁回崑山
太境一律肅清此大股悍賊竄犯太倉經我軍奮勇擊退之實在
情形也查該逆以崑山攻急糾合四五萬眾注意打破雙鳳鎮三
營直入嘉定以斷後路而解重圍其計甚爲兇狡賴將士用命盡
夜苦戰始得以大挫兇鋒而援應崑山之賊復經官軍同時擊敗
城賊爲之奪氣現在戈登備帶外國礮火已於初十日抵崑據程
學啟馳稟北門外已紮賊營二十餘座欲分我攻城兵勢必須乘
勝先剿援賊再圖堅城方無後患臣飛飭程學啟戈登會商妥辦
除得有捷音續行馳報外所有崑山太倉兩路先後擊敗援賊緣
由謹繕摺由驛具

奏伏乞

皇上聖鑒謹

奏

踏平崑山城外賊壘片

同治二年四月十二日

再正在繕摺開接據程學啟稟稱崑山北門援賊連營密布意在抄擾我師十一日五鼓派開字新左營介字魁字等營五成隊伍並水師戰船搭造浮橋黎明各隊齊集先派參將周良才挑帶良字志字等四營繞道至更樓橋以襲該逆後路道員符信游擊龔生陽參將何安泰各帶所部進攻左路副將朱有勝劉士奇都司張行科各帶所部進攻右路程學啟自督親兵並游擊陳忠德洋鎗隊參將王永勝副將陳有昇各隊居中督率戈登亦派常勝軍四百名並帶小開花礮四尊會勦天明直偪賊營該逆乘大霧迷漫四面埋伏約二萬餘眾見我軍至伏兵突起鎗礮齊施勢甚兇猛當派各軍分投迎擊並令副將陽利見督所部戰船夾攻水陸各軍連戰十餘合擒斬悍賊百餘名賊已不支猶拚死抵拒戈登

連放開花小礮擊中多賊該逆大股稍卻程學啟揮令各軍乘勝
進擊自督陳忠德王永勝等堅力猛攻斬馘無算大股之賊始行
狂奔立破賊營十餘座符信等三營由左路進擊宋有勝等三營
由右路直攻復破賊營四座其餘各賊營亦多潰散周良才督率
四營跟蹤追勦陽利見督率各船開礮環攻該逆奔逃無路半就
擒誅計其殺斃賊匪萬餘名落水死者不計其數其破賊營二十
四座奪獲旗幟器械三四千件賊馬二十餘匹餘匪不及入城望
西鼠竄我軍追過西門三里許始行收隊該逆外援受此大創賊
賊喪膽已挑先鋒奮勇乘夜屯紮西門以備阻截竄路一面會同
戈登併力攻打城池並商李鶴章派隊由雙鳳鎮進勦兩路夾攻
等語飛報前來查偽慕王等各股援賊已由太倉敗退崑山猶敢
於北門外連夜築營數十座多方誤我以圖牽制仰賴

聖主威福軍士用命先將城外賊營一律踏平城賊似難久踞臣
惟諄飭程學啟等慎密籌商乘此聲威迅克堅城以期仰慰
慈廑謹附片具
奏

克復崑新摺

同治二年四月十六日

奏爲官軍力攻崑山先下正義鎮斷賊歸路遂將崑山新陽縣城克復宜賊擒斬殆盡恭摺奏祈

聖鑒事竊官軍進紮崑山城下擊敗大股援賊並踏平賊壘二十四座各緣山業於本月十二日馳報在案旋據程學啟稟稱自前月十五日攻克太倉州城十七日卽督率各軍直逼崑山布置牆濠妥爲扼紮該逆卽於城頭排列大礮對營開放四月初二日令奇字副營滾紮月河橋之左該逆糾眾猛攻當經諸將力戰擊退始將營盤紮定初四日復飭開字新中營滾紮月河橋之右該逆見我軍直逼城巢甚爲懼懼僞慕王來王湘王等卽由蘇城糾集大股五六萬眾來援初七日南北二門各出賊萬數千人我水陸各軍擊走之初八日復四出宣擾慕逆挑選悍賊踞月河橋前路

經參將何安泰等殲賊多名卽行退去有尸股數千人擬及更樓
橋令副將朱有勝參將周良才等迎頭轟擊亦卽敗退初九日黎
明復有萬數千賊由南北兩門而出分偏我營欲踰新中營之壕
何安泰等憑牆開礮力拒各軍從旁擊之斬首千餘級該逆以我
軍苦戰死守無隙可乘遂於北門一帶連紮賊營二十餘座十一
日五鼓派周良才督率四營繞襲賊之後路直抵更樓橋派遣員
符信副將劉士奇等分左右翼而進自督親兵繼之先將伏賊擊
敗戈登施放小開花礮助攻諸將人人殊死戰遂連破其二十四
營殺賊過萬我軍追過西門始行收隊此三月十七至四月初十
日進攻崑山及大敗援賊前已韓次奏報之實在情形也戈登卽
欲攻城程學啟密覘地勢城西爲陽澄湖北爲巴城湖南爲青陽
江路隔水其由崑回蘇僅正義鎮一條旱路城賊尙眾必由正

義回竄該處先紮有賊營四座蘇州敗賊屯踞於此接應崑城我軍必先據其後路要隘使賊膽落則破之必矣且破城後不致一名漏網因於十二日與戈登同坐火輪船由崑山南門繞赴正義鎮卽開礮轟擊斃賊無數十三日五鼓程學啟率同記名總兵郭松林滕嗣武陳有昇游擊陳忠德及宋有勝等三營隊伍並副將成俞卿道員徐佩璠參將鄭國魁等水師各船由大河直達正義該逆憑河倚營拒戰當揮令各軍分投迎剿自督開中營洋鎗隊四百名居中策應鎗礮齊鳴子落如雨轟斃及殺斃之賊約二千名副將陳東友張光泰亦督水師前來助戰將賊石營兩座攻克總兵戈登副將李恆嵩乘輪船帶鎗隊二百餘名繼至會合水陸各軍追擊數里又斬賊三四百始還程學啟卽令陳有昇宋有勝各守一營並派水師互相依紮其時慕逆等踞守崑山西門

見我軍已紮正義退無所歸復率三四萬賊直撲我營當督諸軍
前往抵禦各水師亦開礮夾擊擒斬二三千名賊乃奔潰我軍乘
勝逐北斃賊尤眾餘匪敗回崑城郭松林滕嗣武阜隊又會同成
俞卿張光泰陳東友水師守住界口以阻該逆由蘇來援之路程
學啟又飛飭周良才王承勝鄭國魁於北門橋口扼紮三營以杜
奔潰復飭何安泰龔生陽張志邦於東門外站隊竟夜分派既定
時已昏暮聞崑山西城角下人聲鼎沸恐賊復來衝撲卽商令郭
松林帶同陳忠德埋伏橋口成俞卿藏船攔河排列自督親兵扼
紮正義大路果見慕逆等糾合大股山小西門一路拚死猛撲意
在奪路狂奔因排列洋鎗迎擊我伏兵四起呼聲震天水師礮船
連環轟打賊不能支紛紛回竄自督洋鎗突入賊隊郭松林左右
衝突斬殺傷斃者不可數計兩岸積屍數尺河水爲之不流旋報

賊由東門竄出又經副將陽利兒所部戰船擊回隨飭各營按隊而進直抵城下賊猶在城開礮抵抗因派劉士奇張志邦鄭國魁符信攻南門周良才何安泰王永勝龔生陽都司張行科攻北門復派巡湖水師於西門搭造浮橋鎗船由水關潛進劉士奇等各駕雲梯蠅附而上遂於十四日卯刻將崑山新陽兩縣克復其守城各逆無路奔逃盡行剿滅計一日一夜生擒悍賊七千餘人薙斃斬斃二三萬人落水死者無算其守城僞朝將夏天義被擒並供稱僞募王譚紹光等昨夜逃出投陽澄湖而死未知是否屬實此十三日攻奪正義鎮十四日克復崑山新陽縣城之實在情形也由該總兵等詳細具報前來臣查崑新一城爲蘇省東面切近門戶賊以全力守之亦以全力救之我軍甫克太倉卽滾營前進直逼崑山以水陸萬餘人擊敗援賊五六萬眾剗平賊營數十座

而其要尤在不急攻城先取正義一鎮以斷其歸路使賊如阱獸
籠禽束手就縛遂得立復城池數萬之賊盡行撲滅尤足大快人
心外國兵官戈登等並未用其大礮蘇城亦能擒渠埽穴初非臣
意料所及此皆仰賴

聖主威福而諸將士爭先効命先後戰攻二十七日洵屬勞苦功
多戈登山崑山寄書與臣亦稱程學啟調度有方兵力足可制賊
無須幫助當再會同分路進攻該兵官戈登奮勇明白應請
天語褒嘉以示榮寵其統領諸軍克復太倉崑山兩次尤爲出力
之提督銜江西南贛鎮總兵程學啟出奇入險謀略過人可否以
提督

記名遇缺提奏並

賞加正一品封典記名總兵郭松林可否遇有總兵缺出儘先提

奏並

賞加二品封典記名總兵陳有昇副將成俞卿張光泰均請

賞加勇號總兵銜副將陽利見總兵銜升用副將李恆嵩請以總

兵

記名簡放副將劉士奇請

賞加勇號並加總兵銜副將宋有勝請

賞加勇號並給二品封典副將銜參將周良才請以副將儘先補

用並

賞加勇號副將銜參將王永勝何安泰均請以副將推補並

賞加總兵銜參將鄭國魁請以副將留於江蘇補用副將銜吳建

瀛請以副將補用並

賞加勇號游擊張志邦請開復革職處分以參將儘先補用並

賞加副將銜游擊陳忠德請以參將補用並

賞加副將銜都司張行科請以游擊儘先補用並

賞加參將銜之處出自

逾格鴻慈其陣亡之藍翎千總黃虎臣鄧松元五品藍翎把總黃慶榮彭長貴施啟太千總夏化甫梁占鼇汪經山張勝懷東家麟吳長陞把總周得勝胡盛元萬慶普藍翎外委張玉生藍振興謝洪恩施大業張得海劉得魁馬宏元等二十一員應請

敕部分別議卹以慰忠魂其餘隨同出力之文武員弁兵勇及傷亡兵勇各臣詳細查明併案奏請獎卹所有克復崑山新陽縣城緣由謹摺由驛馳陳伏乞

皇太后

皇上聖鑒訓示謹

奏

籌賑收復地方並酌請蠲免漕糧片

同治二年四月十六日

再臣月前巡視諸軍徧歷嘉定太倉青浦華亭婁縣各境首尾二
三百里皆向時被賊踞擾之地三年以來無論大道閒道逆賊出
入蹂躪幾於無地不焚無戶不擄而浦西之太倉嘉定青浦各鄉
浦東之金山縣境被害尤久且烈查蘇省民稠地密大都半里一
村三里一鎮炊煙相望雞犬相聞今則一望平蕪荆榛塞路有數
里無居民者有二三十里無居民者間有破壁頽垣孤殘弱息百
存一二皆面無人色呻吟垂斃詢其生計則云近地無可求乞遠
地不能行走惟掘草根作餅充飢臣職在撫綏目擊情形不勝心
疚上年冬閒青嘉初復時即聞各鄉被難之慘特設善後撫卹局
札委卽補道署蘇州府知府李銘皖督同前刑部山西司郎中王
恩壽候選同知徐震燾等分運錢米挨戶散給按期按村周而復

始藉甦殘喘惟僅青嘉東境其西境至崑太交界賊蹤出沒無時
尚未及辦現飭該委員等趕緊前往分投接濟並會商該州縣
官紳設局籌捐次第賑撫惟念農田荒廢耕具全無不特將來開
墾倍難賦稅無出且當此餉絀民窮捐賑亦不能持久因議招集
流亡酌給蘆席竹葦俾其各就田莊搭棚棲宿補種黃豆包穀蔬
菜等物以備秋後餽口之需其各縣稍爲完善地方另派員紳設
法勸諭借種催耕並督飭該州縣廉靜勿擾以養民力所有新復
之太倉州鎮洋常熟昭文崑山新陽各縣及歷年被害尤重之嘉
定金山兩縣擬懇

皇太后

皇上特沛

殊恩豁免本年漕糧與民休息其餘浦東西各廳縣俟秋後體察

情形彙纂辦理所有現辦賑卹及酌請蠲免各緣由理合會同兩江督臣曾國藩附片具陳伏乞

聖鑒訓示謹

奏

克復江陰縣屬之楊庫汛摺

同治二年四月二十八日

奏爲水陸官軍攻克江陰縣屬之楊庫汛城殺賊淨盡恭摺奏祈
聖鑒事竊崑山新陽克復後總兵程學啟一軍已進紮蘇州東北
之唯亭峴子山一帶距城十餘里步步爲營而僞護王一股由常
州出竄江陰境內意欲渡江擾我完善以圖牽制僞王宗僞王相
各糾眾萬餘僞潮王並由無錫合股竄至常熟西境蔓延甚廣福
山常昭各營出隊雕剿屢獲小勝惟江陰縣屬之楊庫汛城在蘇
常之交去江陰常熟各五六十里爲沿江著名險要之地有悍賊
二千餘人踞守其江陰無錫各城皆恃爲屏蔽必先攻取楊庫然
後可進圖江陰當卽咨商署提臣黃翼升及補用總兵劉銘傳去
後劉銘傳先於四月初八日親帶小隊督同銘字左右前三營進
紮鹿苑黃翼升督水師沿江駐守十五日探報僞潮王分股來援

護逆踞西塘市亦添賊數千劉銘傳以崑城既克東北無虞遂調謝橋各營全移鹿苑以厚兵力十六日卽帶小隊乘霧徑至楊厓察看地勢賊開東門出戰守備唐金洲楊士江等分投迎擊施放洋鎗斃賊甚夥賊乃敗入城中十七日復到西塘市察看賊情都司黃桂蘭等抄擊賊營後卡擒獲數名十八日先令得字有字兩營滾紮距楊厓二里許黃翼升亦派水師由夏橋港上岸堵剿江陰援賊十九日復調銘字正右後三營離城里許分紮三更後劉盛藻於城之東北角築一營壘安置大礮黎明該逆先開礮擊傷我勇十餘人二十日派銘字前營扼紮東門外與左營互相接應已刻江陰援賊數股來撲黃翼升親督水師兩面兜擊斃賊數百名黃衣賊目數名賊遂狂奔副將賴榮光等追殺十餘里是夜二更後劉銘傳復令刁祖璠劉東堂等各帶二成隊伍乘黑暗中於

城濠邊偷築一營未曙濠牆俱就二十一日未刻經劉銘傳派令該營教習法國人畢乃爾呂加等施放炸礮轟倒賊之東北礮臺丈餘賊於二更後欲由南門出走經賴榮光彭楚文等擊回是夜水師亦未撤隊在西門外搭蓋草棚截住江陰歸路二十二日寅刻派得字營攻南門銘前營攻東門銘後營排紫東南之閒以堵西塘市援賊西北兩門則有水師營官王東華賴榮光龍玉麟周國興鄭龍彪等各帶水師進擊辰刻畢乃爾等復將北門月城轟倒數丈劉盛藻唐殿魁各督親兵搭架浮橋城頭守賊施放排鎗我軍傷亡甚眾唐殿魁左腿受鎗子傷劉盛藻赤足渡河指揮弁勇擁抵城下甫將雲梯架上城頭磚石如雨梁玉和唐金洲等大呼登城各勇相繼直進賊首偽鈞天燕李天得錠天豫劉泰生各帶洋鎗悍賊百名抵住缺口鎗矛並擊爬城弁勇陣亡十餘名受

傷五十餘名紛紛退下劉盛藻憤極以木板遮蔽磚石激勵兵勇誓必登城其時王東華賴榮光正攻西北兩門劉銘傳調趙宗道隊伍助之童祖亮率各營奮勇先登逆酋李天得劉泰生仍復抵死抗拒經我軍洋鎗擊斃賊眾慌亂遂乘勢一擁而入所有守城悍賊二千餘名殲戮殆盡賴榮光龍玉麟等由西門而進擒斬逆首趙向林倪士保等多名其逸出之賊又經方有才劉東堂並水師攔頭截殺無一漏網遂於二十二日午刻將楊庫汛城克復其南瀾北瀾西塘市踞逆聯營三十餘座均於是夜遁回無錫常州等處劉銘傳遂督各營入城駐守此二十二日攻克楊庫之實在情形也臣查楊庫一城向有都司帶兵駐紮實爲南岸要隘該逆踞守甚堅援救甚力今賴將士用命奮不顧身猛攻三晝夜傷亡弁勇至二百餘名得以攻克從此進取江陰當可漸次得手且可

遮蔽渡江北窺之路除教習炸礮之法國人畢乃爾呂加請由臣酌給三四品頂戴以示鼓勵其首先登城之副將賴榮光請以總兵

記名簡放縣丞劉盛藻請以知縣選用並加知州銜都司唐殿魁請以游擊儘先補用並

賞加勇號出自逾格

恩施其餘在事出力文武員弁兵勇可否容臣查明歸入克復福山案內一併保獎陣亡弁勇案案請卹所有克復楊庫汛城緣由謹繕摺由驛馳陳伏乞

皇上聖鑒訓示謹

奏

覆奏趙景賢死節摺

同治二年四月二十八日

奏爲遵

旨查明道員趙景賢死節情形恭摺覆陳仰祈

聖鑒事竊臣鴻章於同治元年閏八月初四日接奉同治元年八

月二十二日

寄諭李鴻章片奏湖州失守情形已明降諭旨令曾國藩等查明文武下落具奏矣趙景賢被執不屈大節凜然現尙被賊羈禁蘇城仍著該撫隨時密探情形具奏等因欽此又奉同治元年閏八月十七日

寄諭趙景賢現在是否尙在賊中抑係已經殉難仍著李鴻章查明並湖州城內文武各官下落一併咨會曾國藩左宗棠查明速奏等因欽此欽遵分別咨行轉飭查探去後茲據江蘇候補知府

趙炳麟稟稱本年四月初九日有堂姪孫趙桂生杭人吳姓先後自蘇城賊中逸出到滬稟知堂姪前布政司銜福建糧道趙燾賢於三月十八日在蘇城遇害當查死節各情僉稱被執到蘇後該逆誘倡相從百折不回求死不得自太倉敗賊回蘇播言趙燾賢句結內應有襲蘇之意僞蘇王譚紹光卽於三月十八日設席招飲酒次相詰曰汝通妖兵耶答以我本官兵何得謂通汝獻蘇城耶答以蘇本

大清土地何得謂獻又曰汝今死期至矣景賢仰天大笑曰求之一年而不得者今何幸也遂肆口謾罵譚逆卽取洋鎗對胸一擊而殞連日搜捕餘黨甚急各等語伏查該故道誓守湖州血戰三年嬰城固守五閱月糧盡援絕而陷迨被執到蘇百計誘倡矢志不移卒以身殉遵飭查詢死節情形據實稟報並開具事蹟節略

呈請

奏懇

恩卹等情前來臣等查趙景賢係前刑部侍郎趙炳言之子由舉人選授宣平縣教諭改官內閣中書未及供職咸豐三年奉

旨籌辦本籍團練遂專湖防一面之任三解城圍每戰輒數晝夜殺賊動盈萬至不可數計先後奪獲賊船大小千數百號猶以其閒分兵四出赴援杭州協剿嘉興並克復安徽廣德州及浙江之長興德清安吉武康孝豐等縣以功累擢至福建糧道咸豐十一年冬杭省再陷四面皆賊湖郡勢成孤注該員誓以死守賊既屢受創銜恨入骨竟掘其父趙炳言之墓而益糾大股合圍困之該員先於太湖大錢口添紮水師營以通糧道及是冬十二月大雪三日夜湖水合如平地賊履之而過我師船膠於凍不能戰大錢

口爲賊奪踞運道遂絕猶時時開城出擊奪賊糧以濟食於是賊相戒不與戰移其糧屯遠處而圍攻益急元年正月初十日臣國

藩奉

寄諭垂詢趙景賢能否赴任著酌度情形諭令辦理臣宗棠暨前江蘇撫臣薛煥亦奉

寄諭密速設法傳諭該道交代經手事件輕裝赴任各等因時甯廣時時有賊臣國藩臣宗棠專人前往均由半塗折回三月初三日該道始於圍城中密奉薛煥飭知赴任及賞加布政使銜之恩旨軍氣復爲一振當是時間驅喫緊需才孔亟假使趙景賢遵旨交替湖防自赴新任誠如

恩諭移其捍衛桑梓之力以保障閭閻厥功亦屬甚偉揆以爲國惜身之義亦未始無辭而該道感激益深效死益堅義不忍去

密寄帛書至滬與其叔趙炳麟有眾志成城守死善道之語其素所蓄積可知也自三月以後糧餉軍火俱盡軍民剝樹皮掘草根以食猶能捺斬奸細禁止搜掠忍飢耐戰至五月初三日力竭城陷距賊匪圍城之日已五月有餘從來各處守城無如此之久者趙景賢以辦團紳士倡率兵民同心效命可敬可哀等語隔賊巢數百里無路能援負疚徒深城破後趙景賢抽刀自砍被譚逆奪阻執之至蘇賊始則極肆凌辱至披頰流血欲以摧折其盛氣已復謬爲恭敬百端誘脅該道漠不爲動作絕命詩四章有云亂刃交揮處危冠獨坐時又云厚貌徒爲爾孤忠矢靡他僞忠王李秀成旋有遺歸之意致書以漢壽亭侯歸漢爲言景賢答書以爲擬不於倫並有歸我者之知己不如殺我者之尤爲知己等語先後參證則當時情事宛然可見大義凜凜終能尋約可謂皎然不

欺其志者也核其死事顛末洵屬忠貞蓋世無愧完人其長子深
彥年甫十二歲聞湖州之陷痛父情切卽先服毒自盡已經湖南
撫臣毛鴻賓奏請

獎卹次子五人濱彥年十歲滋彥年七歲其幼者尙在襁抱遠寄
湖湘孤苦無依聞景賢在圍城中及臨終時未嘗以置念也相應
詳細陳明請

旨將布政使司銜福建督糧道趙景賢交部照布政司陣亡例從
優議卹並請

特旨予諡准於湖州本籍地方建立專祠其事蹟節略隨摺咨送
軍機處請

旨宣付史館予立特傳以彰忠節除查明湖州城內文武各官下
落再行具奏外理合先將道員趙景賢死事情形遵

旨查明合詞恭摺陳伏乞
皇上聖鑒訓示謹
奏

分路規取蘇州摺

同治二年五月十一日

奏爲調派各軍分路堵剿現辦大概情形恭摺奏祈

聖鑒事竊崑新克復後卽應乘勝進規蘇城四月十七八等日程
學啟督帶水陸各營進紮崑子山大小唯亭界浦內直等處距蘇
之婁門約二十餘里紮營甫定程學啟與戈登各乘小舟至城下
察看形勢該城周圍數十里各門紮有賊壘數十座城內外守賊
其有五萬餘人堅拒不動我軍僅由東北一路進攻未足制其死
命臣密察賊情盱衡地勢蓋有可慮者三有可幸者二查蘇常杭
嘉爲東南財賦最盛之區逆眾佔踞四年徵糧收稅取精用宏且
時以財粟接濟金陵轉輸各路金陵是其老巢而蘇常杭嘉又爲
金陵根本賊必死守而力爭之以成犄角之勢以護糧餉之源此
其可慮者一也江南多水蘇嘉各郡尤甚湖河蕩港千百通聯津

路迷離橋梁斷續戰船有不能徧及之處陸軍有望洋而歎之時
我難進而賊易守不比中原四戰之地山川瘠苦之邦克一名城
則各城之賊無所繫戀望風而走卽如前此常熟解圍太崑疊克
擒斬悍逆實不下四五萬蘇嘉各賊亦未嘗不膽寒然猶死力抗
拒蓋恃地形之險足以自固又念妻妾財帛之厚不肯遽棄臣由
松滬進兵乃爲蘇省偏隅嘉興對而蘇嘉並圖則無此兵力舍嘉
圖蘇則動輒牽制此其可慮者二也僞忠王李秀成爲諸賊之冠
不甚耐戰而最多狡謀據有蘇杭嘉湖四郡之地其餘各僞王皆
其死黨悉聽指揮咸豐十年圖解金陵圍困而繞竄浙江以取遠
勢十一年圖救安慶而繞竄江西湖北以取遠勢去年迄今圖救
金陵而分竄皖南北又欲繞竄揚州襲下河以取遠勢茲我軍進
徧蘇州該酋仍徘徊金陵上下不卽回顧遺其心腹黨羽分守蘇

嘉若此間攻勦過急則或掣眾來援或月圍竄踞均意中之事此
其可慮者三也惟是江皖浙東各有重兵堵截又赤地千里無所
掠食聞鮑超與曾國荃所派各軍連復巢縣含和已追至江浦浦
口其月股竄天長揚州者人數雖多飢疲實甚都興阿吳棠等果
能竭力堵守不使竄入囊下河鮑超等再速克二浦扼斷北賊過
江之路則各軍分投勦辦較易收拾此其可幸者一也李秀成李
世賢自分踞蘇浙氣勢日盛近歲以來屢挫於官軍各路損傷不
下數十萬其精銳計不甚多各軍攻奪不下數十城其膏腴亦去
其半現在蘇浙各賊惟嘉興陳炳文一股較多而悍有蔣益澧扼
其前軍綴其後至常州無錫直接金陵東壩賊援甚廣深入頗
難但使我軍穩紮穩進得寸得尺毋再失機徐圖制敵此其可幸
者二也臣軍水陸添募及收撫各城降眾已踰四萬督臣曾國藩

以蘇郡可圖太湖可進又添處州鎮總兵李朝斌統率太湖水師
十營剋日下駛協力攻剿現擬酌分三路以剿爲堵由崑山進蘇
州爲一路以程學啟所部陸軍當之由常熟進江陰無錫爲一路
以李鶴章劉銘傳所部陸軍當之署提督黃翼升督淮揚水師各
營往來調度相輔並進戈登帶帶勝軍移駐崑山專備各路游擊
援應由泖澱湖進吳江平望太湖爲一路李朝斌水師當之以上
三路皆欲規取遠勢以剪蘇州枝葉而後圖其根本也又恐分路
並進杭嘉湖各賊繞竄浦東窺撲松滬復派常鎮道潘鼎新帶所
部八營扼紮金山衛編修劉秉璋帶所部七營扼紮涿涇副將楊
鼎勳帶所部五營扼紮張堰聯爲一氣以防內竄俟浙軍得手卽
相機前後夾剿現據程學啟稟報二十九日在陽澄湖迎擊賊船
擒滅千餘仍卽日移紮大小官塘及外跨塘一帶步步進逼李鶴

章稟報業將常熟略國忠降眾編立八營逐漸訓練分置防勦並會督各軍進紮常熟西三十里之王莊探明前面賊營由顧山至無錫城外連亘不絕係僞章王僞潮王僞侍王帶領賊眾六七萬希圖抵禦擬併力兜擊再與黃翼升劉銘傳等規復江陰又據戈登稟稱俟小輪船雇齊或協攻吳江或協勦無錫冀斷各賊援蘇之路臣惟諄飭諸將穩慎以圖互相援救以固全局而慰

宸廑除續後戰狀再行馳報外所有調派各軍分路堵勦各緣由謹繕摺由驛具陳伏乞

皇上聖鑒訓示謹

奏

裁減蘇松太糧賦浮額摺

同治二年五月十一日

奏爲蘇松太三屬歲徵浮額積弊太深請比較近年完數酌中定額以收實課而廣

仁施恭摺具奏仰祈

聖鑒事竊惟大學理財之道於天下必曰平周官土均掌土地之
征必曰均禹貢九等太宰九賦不外平均今天下之不平不均者
莫如蘇松太浮賦上溯之則比元多三倍比宋多七倍旁證之則
比比連之常州多三倍比同省之鎮江等府多四五倍比他省多
一二十倍不等以肥磽而論則江蘇一熟不如湖廣江西之再熟
以寬窄而論則二百四十步爲畝有縮無贏不如他省或以三百
六十步五百四十步爲畝而賦額獨重者則由於沿襲前代官田
租額也夫官田亦未嘗無例矣伏查

大清戶律官田起科每畝五升三合五勺民田每畝三升三合五勺重租田每畝八升五合五勺沒官田每畝一斗二升是官田亦有通額獨江蘇則不然攷宋紹熙中朱子行經界法吳糧每畝五升耳厥後籍禁京韓侂冑等莊爲官田又賈似道廣以公田元代續加官田明祖平張士誠又沒入諸豪族田皆據和籍收糧宣德中巡撫周忱知府況鍾奏減蘇松糧百萬石疏中稱蘇府秋糧二百七十餘萬石內民糧止十五萬餘石餘皆官糧是二者未嘗合併官糧自七斗六升民糧自五升嘉靖中令各州縣盡括境內官民田畝益之分攤定額長洲縣官田最多故額最重他縣他郡官田遞少故額遞輕今長洲等縣每畝科平米三斗七升以次不等折實粳米多者幾及二斗少者一斗五六升遠過乎律載官田之數此蘇松太重賦之源流也自明以來行之五百年不改而其中

升降盈縮則因時而異蘇州府志稱明臣周忱奏令輸布一匹準米一石輸銀一兩準米四石又稱課吏以催科六七分爲上考終明之世無徵至八九分者

國朝康熙十三年前撫臣赫天顏疏有曰無一官曾經徵足無一縣可以全完無一歲偶能及額雍正中奏準江蘇漕米折徵每石銀一兩其時銀價每兩易錢七八百文以此觀之前明及

國初賦額雖重大都逋欠準折有名無實而已嗣是承平百餘年海內殷富爲曠古所罕有江蘇尤東南大都會萬商百貨駢闐充溢用於襄區當是時雖擔負之夫蔬果之儲亦得以轉移執事分其餘潤無論自種佃種皆以餘力業田不關仰給之需遂無不完之稅故乾隆中年以後辦全漕者數十年無他民富故也惟是末富非本富易盛亦易衰至道光癸未大水元氣頓耗商利減而農

利從之於是民漸自富而之貧然猶勉強支吾者十年迨癸巳大水而後始無歲不荒無縣不緩以

國家蠲減贖典遂爲年例夫癸巳以前一二十年而一歉癸巳以後則無年不歉且鄰境皆不歉而蘇松太獨歉此何理也謂爲州縣捏災此三十年中督撫司道更數十人之多豈無一二不肯黨同欺妄之人而且

聖主不加斥戶部不加駁廷臣科道不加糾此又何理也誠以賦重民窮有不能支持之勢部臣職在守法自宜一切不問堅持不減之名疆臣職在安民實因萬不得已爲此暗減之術始行之者爲前督臣陶澍前撫臣林則徐皆一代名臣揣其意必謂減額則永不能加災緩則後不爲例原冀民氣漸甦無難復舊初不意年復一年且年甚一年而不可返也臣竊惟前辦全漕之時間遇水

旱辦成災者一辦帶徵者九帶徵之後依然全漕故以年計爲減
成以十年計非真減成也今則年年辦災永無帶徵之日乃真減
成也又官墊民欠一款道光之初數僅分釐癸巳以後馴至一二
成大所謂墊者豈州縣之果能墊哉不過移雜墊正移緩墊急移
新墊舊移銀墊米以官中之錢完官中之糶將來或額免或攤賠
同歸無著猶之未完也故歷年糧冊必除去墊欠虛數方得徵收
實數以此數民固未嘗完也伏查蘇屬全漕一百六十萬厥後積
漸減損蓋自道光中年始於今三十年矣禮曰以三十年之通制
國用言綜乎三十年之大凡斯以後可知也今試以道光十一年
起至咸豐十年止三十年中運數分計之辛卯以後十年共數一
千三百餘萬內除官墊民欠得正額之七八成辛丑以後十年共
數九百餘萬內除官墊民欠得正額之五六成咸豐辛亥以後十

年其數七百餘萬內除官墊民欠得正額之四成而已自粵逆竄陷蘇常焚燒殺掠之慘遠接宋建炎四年庚戌金阿朮故事蓋七百有三十年無此大劫臣鴻章親歷新復各州縣向時著名市鎮全成焦土孔道左右蹂躪尤甚又各賊不能相統此賊所踞難免彼賊劫掠故賊境卽不與官兵交界亦皆連阡累陌一片荆榛凡田一年不耕便爲荒田今已三年矣各廳縣冊報拋荒者居三分之二雖窮鄉僻壤亦復人煙寥落闕於頽垣斷井之旁遇有居民無不顰面鳩形奄奄待斃傷心慘目之狀實非鄭俠流民圖可比已復之松太如此未復之蘇州可知而欲責以重賦責以數倍他處之重賦向來暴斂橫征之吏所謂敲骨吸髓者至此而亦無骨可敲無髓可吸矣

皇上視民如傷未傷者猶且如傷況已傷而傷又至重者乎斯卽

據情籲請全行蠲免三五年在

皇上如天之仁必蒙

俞允惟是

天庾正供停運三年軍糈浩繁度支仰屋其何以濟臣等所不敢
出此也又荒田召種有順治年間各省屯田之例可援然墾熟既
遠升科更遲現報荒田三分之二已荒者議蠲未荒者議減將所
存僅止一二成亦臣等所不敢出此也至於辦災例案自七八成
而五六成而四成咸豐三年聞警拋荒僅止三成若稍存苟且彌
縫之見援拋荒之案減而又減約得二三成非不可以塞責但前
督撫臣之所以爲此者尙或冀其復舊今則明知無復舊之望而
狃於積習不以直陳是全無爲
國之心徒有罔上之咎又臣等所不敢出此也臣等細核歷年糧

數咸豐十年中百萬以上者僅一年八十萬以上者六年而皆有
官墊民欠十餘萬在其中是最多之年民完實數不過九十萬成
案如是民力如是積弊之後大難之餘催科一事棘手尤倍臣等
蒿目艱難悉心籌畫上體

宵旰憂民之切下維軍國待用之殷於萬難偏重之中求兩不相
妨之道似宜用以與爲取以損爲益之一法比較歷來徵收各數
酌近十年之通改定賦額不許捏災不許挪墊於虛額則大減於
實徵則無減窮變通久於此時爲正辦或者謂據此定額未免過
少不知減餘之數仍通省莫重之數尙非宋元舊額不得謂少且
不自今日始也咸豐十年以前歷年如是未嘗於歷年
國用有減也彼時兵革未興生聚未改田園廬舍未有損非猶是
完善之江蘇乎夫完善之江蘇僅有此數卽殘破之江蘇不應仍

有此數今臣等於殘破之餘請照完舊之時定額且不援近年最少之數不假借墊欠虛數誠不敢謂必有把握若仍執久置不用之虛額衡量多寡欲求轉逾乎完善之時

皇上聖明洞鑒有是事乎有是理乎事理所必無卽刑法所必窮恐賢如劉晏李巽不賢如裴延齡李實亦且束手無策矣又或者謂數既猶是何不仍夫舊貫尙有冀於將來不知乾嘉之江蘇實千歲一逢之盛會不可爲例竊謂自茲以往如天之福東南無事休養生息二三十年尙可復咸豐及道光末年之江蘇更二三十年冀可復道光中年之江蘇而懸此虛額數十年以待之無論無此政體恐異日之利未必能復目前之害已不可支蓋臣等今日之所辦所謂以與爲取以損爲益者方將借減賦之名爲足賦之實所以能照完善之時定額者其機括全在減賦二字中也何以

言之辦災辦緩權在胥役防弊雖有百法舞弊奚啻千端止此民
力止此地產不減額之弊在多一分虛數卽多一分浮費減額之
效在少一分中飽卽多一分上供減額既定胥吏無權民間既沾
實惠公家亦有實濟是爲轉移之善術一也吳民死亡之外大半
散之四方故鄉賦重望而生畏尋常蠲緩不足去重賦之名招之
不來荒田愈久愈多何法以治之惟聞減賦之令必當爭先復里
是爲勞來之善術一也往者諸城被陷官吏一空鄉團抵死拒敵
鏼聲所達萬眾爭先小股賊匪見輒卻走卽以三首縣言洞庭香
山金市各鄉有相持至七八月之久者固由

朝廷恩澤之至深亦徵愚賤天良之未泯此時減賦令下彼見
皇上於經費匱乏之時尙有此度越尋常之舉有不感生望外踴
躍輸將者乎是又激勸之善術一大抵以事理而論殘破之視

完善必應遞減而有此三者可以彌補此遞減之數則又以事理決之臣等所謂以與爲取以損爲益者此也現在蘇郡尙陷賊中聞各鄉多爲暗團之約待時而動以應官兵卽如常熟反正鄉民毀賊卡殺賊目者凡十餘處昆山克復沿湖居民截殺竄賊無數是其明證一聞滅賊之令必當感激涕零望風增氣他日軍麾所指弩矢之驅必更奮筆壺之雅必更誠又未始非固結招徠之一法臣等伏查順治八年三月奉

上諭凡故明仇怨地方或一處加糧甚重我朝並無仇怨何可踵行此等情由詳察具奏欽此於是江西袁瑞等府明初因陳友諒抗師加糧倍重布政司莊應會奏復舊額蘇松獨未及上請又雍正三年三月十九日怡親王奏請酌減蘇松浮糧奉

旨蘇松之浮糧當日部臣從未陳奏常廩

皇考聖懷屢欲施恩議減今怡親王等悉心籌畫斟酌奏請朕體
皇考愛民寬賦之盛心准將蘇州府額增銀蠲免三十萬兩松江
府十五萬兩欽此又乾隆二年奉

上諭江省糧額尙有浮多之處著再加恩免徵銀二十萬兩欽此
部文照雍正三年例辦理仰惟

列祖

列宗當東南全盛之時猶復

軫念民依如此其深且厚況今日之兵燹子遺流離瑣尾至於此
極也乎漕糧爲惟正之供而蘇松獨曰浮糧曰浮賦見諸

列聖諭旨及郡縣志書不以爲嫌是知實有浮多應減之處留以
待我

皇太后

皇上行之者也惟有籲懇

聖慈鑒察特沛

殊恩俯准減定蘇松太三屬糧額由臣等督飭司道設局分別查明各州縣情形以咸豐中較多之七年爲準折衷定數總期與舊額本輕無庸議減之常鎮二屬通融核計仍得每年起運交倉漕白正耗米一百萬石以下九十萬石以上著爲定額卽以此後開徵之年爲始永遠遵行不准更有墊完民欠名目似此核實辦理不特酌十年二十年之通相較固無所紕卽酌三十年之通相去亦不甚遠至官墊民欠本屬弊政新復之地百款皆空無可墊而欲其墊弊更出必宜永遠禁止又嗣後非大旱大水實在荒歉者不准捏災著爲令伏願

皇太后

皇上俯念蘇松各屬爲十八省未有之重賦非他處被陷州縣可比又爲七百年未有之大難非歷年被災例案可比去無益之虛籍求有著之實徵下延億萬垂盡之生上繼累朝未竟之志民生幸甚

國計幸甚如蒙

俞允欽遵俟蘇屬肅清一體辦理先自松太創行由臣等設局擬定章程其漕糧一切瑣屑款目酌定歸併汰除以省煩文而昭實際續再縷晰具

奏謹將歷年起運數目繕具清單又蘇松財賦考一書曾收入

四庫館於重賦始末言之頗爲詳盡一并恭呈

御覽所有蘇松太三屬歲徵浮額積弊太深請比較近年完數酌中定額緣由謹合詞恭摺具陳伏乞

皇太后

皇上聖訓示謹

奏

清查蘇松漕糧積弊片

同治二年五月十一日

再蘇松漕糧積弊視他省爲甚其最不公平者莫如大小戶之分蓋州縣徵收錢糧皆有折色平餘缺分之肥瘠以錢糧之多寡爲衡應酬之豐殺又以缺分之肥瘠爲準錢糧重則折色平餘亦較豐酬應亦較鉅積習相仍而

朝廷之正供可緩陋規之成例必不可裁州縣一切取之糧戶而蘇松太三屬漕額獨重世家大族亦獨多皆能以正供定額與州縣相持於是一切攤之民戶惟所誅求漫無限制因有大小戶之名一以貴賤強弱定錢糧收數之多寡不惟紳與民不一律卽紳與紳亦不一律民與民亦不一律紳戶最少者一石完不足一石多者遞增最多者倍之民戶弱者完折約三四石當一石强者遞減尤强者不足二石而紳與民又各有全荒之戶紳以力免民以

賄免同一百畝之田有不完一文者有完至百數十千者大率以小戶之浮收抵大戶之短價小戶不勝其苦其黠者又詭寄於大戶而大戶益多小戶益少其勢遂偏重於一二安分之平民而催科敲朴之慘拘繫之繁無一非傷民氣者推原其故皆由錢糧額徵過重激成大戶把持之勢而迫州縣以出於剝削小民之計此又明以來五百餘年積漸之習流極於今日無可爲善全之術者也故以核減浮糧爲理漕之綱卽以辦理均賦爲治漕之用當先除去大小戶名目使州縣不得意爲高下以肆其苛勒而後浮收之弊乃可次第清釐臣查錢糧浮收自嘉慶以後漸次增加其時州縣之殷富已漸不如從前而浮收反日重者則以彌補州縣虧空定爲攤賠之計挪東掩西弊端百出一切取償於錢糧各營上司知其弊而無能禁制又運糧之旗丁收漕之倉書互相需索年

甚一年其始因浮收而有浮費其後浮費日增浮收亦遂積爲固然日求取盈官民相爲疾視無復上下相維之意故臣以爲蘇松漕糧核減後必以革除大小戶名目爲清釐浮收之原以裁減陋規爲禁止浮收之委如蒙

皇上天恩俯准將蘇松浮糧酌中定額臣卽督飭司道等設局清查隨各州縣風土人情之宜明立章程酌定折價紳衿平民一例完納永遠革除大小戶名目不使州縣陵虐小民敢爲暴斂而不顧亦不使各項陋規困苦州縣迫使病民而不辭謹先將大概情形縷晰上陳伏乞

皇太后

皇上聖鑒訓示謹附片具

奏

擊敗江陰無錫拔賊摺

同治二年五月三十日

奏爲水陸官軍會剿江陰無錫大股拔賊踏毀賊營百餘座追殺七八十里大獲全勝恭摺奏祈

聖鑒事竊官軍攻克江陰縣屬之楊庫汛城並令李鶴章會督各軍進紮常熟西三十里之王莊與黃翼升劉銘傳等力禦援賊經臣節次奏報在案先是江陰地界之顧山起至無錫城外止連互數十里賊營密布係僞章王護王普王潮王侍王五逆帶領賊眾八九萬人希圖援應江陰規竄常熟其江陰另股又於五月十四五日圍撲楊庫經劉銘傳督軍痛剿擒斬千餘大破之續據探報忠逆渡江回援頭隊已到無錫聲稱合五逆之眾水陸數十萬分路內犯李鶴章與黃翼升劉銘傳熟商乘該逆遠來疲憊銳氣未復一痛懲之五月二十日辰刻率各營官赴顧山一帶蹣看賊勢

北自北澗南至張涇橋東自陳市西至長壽縱橫六七十里凡大小村市共紮石營土營百數十座木卡石卡百十餘處俱係憑河扼紮并於大河各要口拆毀橋梁排列礮船布置嚴密幾於無處著手遂議分路滾營而進總兵劉銘傳督銘字七營併紮行營三座進攻北澗爲左路總兵滕嗣武知府張樹聲游擊周盛波各帶所部八營併紮行營三座進攻麥市橋爲中路總兵郭松林副將吳建瀛黃中元各帶所部八營併紮行營三座進攻南澗爲右路復慮無錫援賊繞抄王莊老營令周壽昌帶親兵正營黃金志帶親兵副營由嚴家橋進攻張涇橋一帶賊營黃翼升督同總兵王東華賴榮光參將孫善成三營水師隨中右兩路陸軍分進李鶴章自帶馬隊及羣字忠字等營在顧山上下排列大隊策應復探離蘇州十八里蠡口有賊甚眾恐由吳塔羊尖水道內犯黃翼升

飭令副將鄧良里帶淮揚親兵左營參將張學仕帶淮揚新中營
先於二十日攻破該處賊營二座擒斬賊百人仍移堵羊尖細橋
各隘并檄令副將張桂芳知縣余思樞日出小隊赴謝家橋排列
助勢二十一日亥刻諸軍各出六成隊移紮右路南抵陳市該逆
已於街頭紮兩石卡阻我進兵并以礮船依卡抵敵黃翼升親督
舢板轟擊焚其四船郭松林乘勢攻入擒斬百餘名賊卽遁去遂
與吳建瀛黃中元何映文等傍前後大河分紮三營劉銘傳先於
二十一日因常州新到大股盤踞華市擾近楊庫派令副將耆貴
等擊走之二十二日復督各營六成隊欲於北潞河北對紮兩營
安放炸礮該逆先以礮船隔岸對轟不能近逼遂飭知縣劉盛藻
游擊唐殿魁等各帶小隊護同舢板引入河內盡力轟打盡焚賊
舟得與賊之石壘營抵紮滕嗣武張樹聲等隊伍行近麥市橋該

逆先搭浮橋渡河經周盛波張樹珊等各帶洋鎗隊奮勇衝擊戰
數十合該逆敗退河西斬溺無算我軍焚其渡船乃得依岸屯紮
至二十二日各路濠壘均就李鶴章在顧山頂上發號揮旗飭令
一齊進攻左路劉銘傳當放炸礮三十七次打倒北濠河邊石礮
五座轟斃百餘賊羣逆退伏營外濠中以洋鎗千餘排列施放傷
我哨官二名斬奪和傘水師百人拚命撲之又傷二十餘名守備
楊士江率奮勇二十餘人赤身赴河皆受鎗傷不能進該逆復於
上流架橋渡河抄襲趙宗道劉東堂等擊敗之中路周盛波孔昭
佑張樹珊滕嗣武分帶小隊伏於河隄以礮山礮排轟破其木卡
七處右路吳建瀛黃中元何映文各以洋鎗百餘繞近南濠營邊
適該逆於河岸排隊鎗斃百餘人卽退守營中對施鎗礮相持至
午李鶴章遙見無錫援賊萬餘由張涇橋緱山羊尖各路抄來恐

周壽昌等水陸單薄抵敵不住飛謁苗順清孫傳成賂金榮帶隊
往助周壽昌於嚴家橋以馬隊洋鎗向前衝突斃賊無算生擒七
十餘名奪馬十二匹該逆併退長涇其水路之賊見我軍礮船排
轟遂亦遁去黃翼升李鶴章因令中右兩路大隊順河排伏僞作
潛渡之狀而王東華賴榮光分帶舢板九隻呂世煊帶鎗船十隻
由南澗衝進焚其礮船十餘號賊猶不退悉以大礮洋鎗抵擊水
師不能登岸郭松林乃乘閒越過南澗徑趨長涇賊眾驚慌疑從
天降參將張林錦游擊李長樂帶隊分攻東頭石營連放火彈噴
筒口煙一擁而上斃賊數百賊眾悉併街西郭松林率同張林錦
繞撲街西頭營該逆以洋鎗排拒張林錦奮不顧身拔榕直上被
鎗子打傷胸膛登時陣亡郭松林憤極與李長樂親領方桌門板
擁入石營斬首百餘級衣爲血染李長樂腿受矛傷猶復力戰賊

始大敗街西十餘營之賊相率狂奔郭松林追至竹塘見大隊隔遠策馬回戈詎北潯逆眾分救長涇斷我歸路適吳建瀛黃中元等趕至前後夾攻賊始潰退其時天氣苦熱將士飢勞傳令撤隊回營是夜李鶴章黃翼升同赴陳市知會劉銘傳傳諭諸將各攜門板柴草多搭浮橋於月上時以各色火器偷擾賊營并令大隊埋伏要口以備截殺竄賊諸將踴躍從令四更後各路火器齊發鎗礮如雨該逆紛紛奔潰水陸官軍鼓噪而進喊聲震天當被劉銘傳攻破北潯賊營二十七座滕嗣武王東華張樹聲周盛波攻破麥市橋賊營二十三座郭松林吳建瀛黃中元賴榮光攻破南潯賊營三十五座捻逆眾六七千名戰至天明江陰無錫援賊由跨塘橋長涇西陳家橋分路來援與敗賊合隊仍有十餘萬眾盡力迎拒李鶴章令各軍以小隊衝進以大隊圍襲之戰不數合

賊卽返奔左路劉銘傳追殺至八字尖右路郭松林賴榮光等分
追至竹塘長壽滕嗣武王東華等追殺至三巴橋沿途又殺斃溺
斃賊匪八九千名踏毀賊營賊卡百餘座計兩日一夜生擒僞王
宗僞朝將主將及義安福燕豫各逆首百餘名悍賊五千餘名轟
斃斬斃萬餘名溺死者無算焚燒賊船七十餘隻奪獲賊船三十
餘隻賊馬五百餘匹僞印二百餘顆旗幟洋鎗軍械數千件查點
各營弁勇傷亡約百餘名顧山以西縱橫七八十里一律肅清此
五月二十二二十三兩日一夜水陸官軍會剿大股援賊大獲全
勝之實在情形也山黃吳升李鶴章各稟前來臣查蘇州爲眾賊
巢穴我軍從崑山進攻僅當一面未足制賊死命故擬由常熟分
擣江陰無錫爲扼吭拊背之計賊乃救其所必攻以五僞王率領
數十萬眾連營六七十里與我力抗仰賴

聖主洪福士氣百倍日夜血戰獲此奇捷足以寒賊膽而振軍威
昨准曾國藩來函偽忠王李秀成於五月十三日由金陵回救蘇
州程學啟稟稱忠逆於二十二日糾集大股已入蘇城徧貼偽示
聲稱分四路內竄幸其部眾新喋血於江常之間其氣亦稍挫遏
諸將士於炎天烈日中馳逐鏖戰死傷喝病不遑顧恤自應懇
恩迅速鼓勵以勸將來其尤爲出力之遇缺提奏總兵郭松林福
建金門鎮總兵王東華可否均

賞加提督銜記名總兵滕嗣武補用總兵劉銘傳可否遇有總兵
缺出儘先提奏請

旨飭放江蘇補用知府張樹聲可否免補本班仍留江蘇以道員
遇缺請簡並

賞戴花翎副將黃中元可否以總兵

記名簡用副將鄧長里副將銜參將張學仕擬保游擊儘先都司李長樂可否均

賞加勇號李長樂並請以參將補用擬保參將儘先游擊周盛波可否以副將留於兩江補用游擊銜顏邦桂常熟解圍案內擬保游擊銜周壽昌可否均

賞加副將銜以上各員多係福山解圍克復崑太三案出力奏准彙保人員緣疊次奮勇爭先不敢不據實聲明其餘出力文武員弁兵勇容臣查明彙案保奏至此次力戰陣亡之擬保副將儘先參將張林錦擬保游擊儘先都司汪龍淦擬保都司儘先守備施銀貴均請

敕部從優議卹以慰忠魂所有水陸官軍會剿江陰無錫大股援賊大獲全勝緣由謹繕摺由驛馳陳伏乞

皇上聖鑒訓示謹

奏

關稅留抵軍餉摺

同治二年五月三十日

奏爲查明實在情形請

旨將江海關所收各稅仍准留抵上海軍需並照案請銷折耗恭摺奏祈

聖鑒事竊准戶部咨奏參江海關徵收洋稅等銀全數動撥軍需無存一摺於同治元年十二月初一日奉

旨依議欽此查原奏內開例載各省關稅銀兩管關監督於年滿季滿時遵照定例解交部庫該督撫毋得率行指撥如遇有迫不及待之項准其聲敘實在情形專摺奏明辦理今江海關自咸豐十年七月二十六日起至十一年七月二十五日止徵收西洋各國稅鈔及進口洋藥稅銀內地子口半稅出口土貨半稅關照船進出口正稅以及內地絲商補納三關稅銀內除扣交英法各二

成並折耗等銀統計一年期滿其實存銀一百三十一萬八千七百七十七兩六錢七釐六毫據該撫奏稱因軍務喫緊動撥無存等語查該關徵收西洋各國稅鈔銀兩除洋藥稅一項例應專款解京外其正半各稅應恪遵定例專款存儲分批解部即不得已借撥軍需亦應先行奏明方准動用其代徵太平北新關絲稅銀兩亦應查照舊章撥還三關今該撫並未奏明承任該關道將徵存洋稅及代徵三關絲稅銀兩繕稱軍需支絀全數撥解已與定例不符況子口稅土貨半稅等項俱係近年奏明新增並非該關本有之稅豈容一并動用且不將掣回實收送部請嚴飭該關道將動撥洋稅銀兩掣回庫收送部查核銀數相符方准開銷仍一面造冊報銷其子口稅土貨半稅等項但令於接到部文之日在新徵稅銀項下照數解部以充京餉至代徵三關絲稅亦令先行解

部一面知照各該關歸人題報案內聲明報部核銷以清款項。倘有玩延再奏明嚴參並請將擅自動撥稅銀之關道吳煦交部照例議處。嗣後該關自咸豐十一年七月二十五日以後所徵洋稅正項除扣交二成外其餘均應奏明方准動用其子口稅土貨半稅代徵三關絲稅全數解部不准絲毫動撥現既擅動如延不提還卽著落該關道照數賠繳以重稅課再查江海關自道光二十三年五口通商洋商完納稅鈔銀兩每百兩請開銷折耗銀二兩惟天津粵海等關洋商完納稅鈔均每百兩開銷折耗銀一兩二錢與五口通商成案有減無增今海關徵收稅鈔仍開銷折耗銀二兩自係遵照舊案辦理以後應援照天津粵海二關新章每百兩開銷折耗銀一兩二錢仍於年終送部查核等因。准此臣查咸豐十一年以前收支關稅各款均非臣任內之前事。前管關道吳煦

雖另案革職該員在任有年係屬一手經理責無旁貸當卽劄行現署蘇松太道黃芳會同吳煦迅將動撥洋稅銀兩趕緊造冊報銷並遵照部咨指飭事理刻速分別詳辦去後茲據詳稱江海關徵收洋稅咸豐七八九等年均儘數解交蘇省籌餉局集撥軍餉是在蘇常未失守時已不能循例解部十年四月蘇省淪陷太倉嘉定青浦相繼失守上海一隅之地大股賊匪時來撲竄經前撫臣薛煥調集兵勇分投堵剿保此危城所需糧餉以及置備軍火暨協濟鎮江兵餉爲數甚鉅別無可籌是年十二月由薛煥奏請將海關所徵洋稅子口土貨半稅並洋藥稅銀儘數抵撥本省軍餉是已

奏明有案並非擅自動撥且均經聖有批迴將來辦理報銷自當一併送部核銷至所云接到部文之日於現在新徵稅銀項下照

數提回分款解部一節查現在嘉青崑新常昭太倉各城雖經克復而蘇常各屬尙爲賊踞官軍分投防剿力圖進取調募愈眾需餉愈多不得不隨時接濟內若鎮江協餉每月奏定三萬兩源源撥解又英法二國駐兵上海自十一年冬間辦理會防凡租賃兵房支應出隊舟車夫馬等款又奉總理衙門與英法公使議定上海教練洋鎗勇六千八百餘名以上兩項共月需經費銀四五萬兩不等又常勝軍四千餘人向有外國兵官管帶教練其辛工口糧章程較各項弁兵加倍相沿已久按月支放不能稍欠所用皆外國軍火並租借輪船等價計數尤昂均爲軍需則例所未載亦經疊次奏明在案此外尙須籌備水陸各營軍火並蘇藩司衙門借撥俸餉等款每月合其需銀四五十萬兩放款常不及半而海關所徵各稅自元年十一月後漢口九江開關長江來貨悉在該

關就近完納滙關收數較前大減自本年四月後各口免單又改
爲存票收數較前更減前屆關期所撥銀兩既係入不敷出現存
正稅並子口土貨半稅及洋藥稅每月實在收數不過十萬以內
儘抵本省軍餉萬分竭蹶全賴捐釐貼補勉強支持若使專款存
儲分批解部必至餉匱兵譁有關大局惟有仍照前奏請將現徵
正半各稅及洋藥稅一併留抵上海軍需俾救時而免決裂俟
蘇省肅清中外兵勇遣撤再當遵解部庫以顧京餉至折耗一項
緣上海自道光二十三年開市通商海關設立銀號各洋商赴號
完稅俱用九六七成色銀若責令補水該洋商非特不允照補反
稱額外需索而海關放解餉銀必須同火傾鎔足色庫寶每兩折
耗銀三四分至五六分不等經前撫臣傅繩勳於道光二十九年
奏請折耗銀三分在於正稅內作正開銷奉部議核減一分每兩

准銷二分如再不敷由該管關道自行設法籌補歷經遵辦在案
此次部議十一年七月二十六日以後改令援照天津粵海新章
每百兩開銷折耗銀一兩二錢查粵海關新定章程無從查悉至
天津關試辦章程第一款內開條約所載洋稅舊定每百兩交
傾鎔銀一兩二錢今照新章均按部頒庫平完納足紋裁撤傾鎔
之費將來起解部餉實成官號按照天津關餉傾成足色庫寶每
百兩由官加給傾鎔耗費銀一兩二錢等情是天津關所請加給
傾鎔耗費銀一兩二錢係因洋商完納庫平足紋裁撤易交傾鎔
銀兩而設而海關折耗實因洋商完稅所交上海通用市銀向稱
松江錠祇九六七成色並無足色一經回火傾鎔每兩已折耗銀
三四分至五六分不等原案每兩請銷折耗三分部議核減一分
准銷二分如有不敷尚須關道籌補當日減定之數實係因地制

宜蓋其回火折去之耗由於上海本地銀色太差較他處爲獨多
在銀號經收稅餉本無例支工食所需房租飯食辛工硝炭等項
向賴傾鎔銀一兩二錢以資開銷是以開辦新章十餘年來洋商
隨正月交傾鎔工費而折耗仍准並銷折耗與鎔工本係兩款判
然不同亦並行不悖今既准免洋商另交鎔工此款卽歸無著若
又核減折耗銀號固無力賠墊關道亦無法籌補應請仍照原案
每百兩准銷銀二兩以免流弊其銀號鎔工如有不敷容另行籌
議等情詳請具奏前來臣復加查核前屆關期將所徵洋稅儘撥
軍需勢非得已經前撫臣專摺奏明有案尙非擅行動用置京餉
於不顧現在兵數日增稅數日減以稅抵餉隨收隨放不敷甚鉅
此中外所共見其間萬不能提還前款亦不能存儲批解以致貽
誤江南大局至海關折耗每百兩准銷銀二兩實緣本地銀色太

低洋商既不另交鑄工銀號無從貼賠火耗與天津各關礙難一律且本係部臣減定未便再事核減該道等所議委係實在情形可否仰懇

天恩俯念蘇省軍務喫緊仍照前奏將現徵正半各稅及洋藥稅一併留抵上海軍餉并照舊章請銷折耗免其置議臣運籌無方未能兼顧京餉紓

宵旰之憂勤塞部臣之責望殊屬咎無可追惟江南用兵以來關稅極旺之時尙不能分款解部至臣今日徵稅愈細募兵愈眾中外交涉之事愈多各項開銷迫不及待積欠疊疊焉有餘款可以報撥如託

皇上威福一二年間東南肅清中外各軍陸續裁撤自當遵解部庫稍濟艱難所有江海關現收各稅仍留抵蘇省軍需並照案准

銷折耗各緣由謹摺具陳伏乞

皇上聖鑒訓示謹

奏

李文忠公奏稿卷二